

DYUS YUWE SAN JUAN FI'JNI

Cristo naa quiwete vyaani

1 ¹Nyafiitey naa quiwe meefin, Cristo' üsyä'cj yu'. Tyä' Dyus yacjcu üsu', sa' Dyus írráac yu'. ²Nyafiiteya' tyä'wéc Dyus yacj üssa yu'. ³Dyusa' tyä'sna neewe'werrac quíjquijnava jyuca cviituj'. Tyäa pa'ga naa quiwete quíjquíjva üssa' jyuca tyajy vitnirrarráata'. Dyus yacj üssa quíjquijnava vitmeevatsa', quíj yujva mee yuutyna. ⁴Uurra qui' ítyi yuuwa'ja's tyäac ji'pju', sa' tyäa írráac nasaty eena'te caafi'nze'jwa'jsa yu'. ⁵Tyäa eena'sa' chji'ndyte cweetjcu, atsa' chji'ndysa' fíchjaya' äjame!.

⁶Tyäa eena'sa's tuutje'jsa' teech pitstjē'j Juan yaasesac yu' Dyus caajni. ⁷Tyä' tyäa eena'te caafi'nze'jwa'jsa's tuutje'jsac yu', maava tyajy tuutje'jni's wēse'jrra Cristo's üuste jypa'gacajn. ⁸Juan yu' eena'te caafi'nze'jwa'jsa meec yu', naasáa eena'te caafi'nze'jwa'jsa's tuutje'jsarráac yu'. ⁹Naapcachja' nasaty eena'te caafi'nze'jwa'jsa Cristo' naa quiwete vyaatsrráac yu'. ¹⁰Sa' vyaarra' naa quiwete fi'nzena üsu'c. Tyä'wēteva, naa quiwetewe'sha' jiyumeeta', macue tyajy vitnisarrava. ¹¹Tyajy vitni quiwete vyaateva, tyajy jil'j jínisa' jypa'gameeta'.

¹²Macue tyajy jil'j jínisa jypa'gameeteva, maaí yu' tyä's nwēese'jrra üuste jypa'gaty. Atsa' tyä'sna jypa'gasatyi's Dyusa' tyajy luuch yuuwa'ja's üscu. ¹³Tyäa pa'ga tyäawe'sha' naa quiwete neywe'sh cacueju cacue yacj upyji'ty neywe'sh jytjáasni tyä'wésameeta', tyäawe'sha' Dyus luuch yuuna pa'jsata'.

¹⁴Nyafiitey Dyus yacj üssa' nasaa cacue's jypa'garra cue'sh yacj üsu'c, isasarrá's pta'shna peeygājna. Tyäa pa'ga cue'sha' tyajy fi'nzeni wala zhichcuesa's uytja'w, tyäasa jii'tja'w Dyus Nchi'c teechrráasateva. ¹⁵Tyä'snac Juana' tuutje'jna na'jína we'we:

—Andya' na'snatj pta'shi' i'cue'shtyi: Andy e'ste yuja' tyä' andy naa quiwete upymeyna we'shcu yu', tyäa pa'ga andyte jytjaacuesa' jínac pta'sh.

¹⁶Atsa' cue'sha' tyajy peeygāani macue ne' yu' tyä'sa' jyucattja'w jypa'ga jyucaysa. ¹⁷Nyafí' juuna' jycaajnisaya ley Moises nvijtcu tyä'srráanatja'w jypa'ga, naapcachja' Jesucristo' isa Dyus peeygāani'scu nuypa'j tyä'snatja'w

jypa'ga. ¹⁸Nava maa yujva Dyusa's iiuymeeta'. Tyā'wēteva Dyus Nchi'c teechrráasa Ney yacj ij ūssa' cue'shtyi' caajiyu'cj Dyus ma'wēsateva.

Jesus quimteva Juan pta'shni

(Mt. 3.11-12; Mr. 1.7-8; Lc. 3.15-17)

¹⁹Jerusalente judiuwe'sha' pējyya' caajty sacerdote vite' levitawe'shtyi Juan quimteva jiyuya'. ²⁰Atsa' Juana' āatec pta'sh:

—Andya' Cristomeetj jīna.

²¹Tyājū' qui'quin pējytyi:

—Tyā'wērra' ¿quimnga? ¿Tyāniitey Dyus yuwe pta'shsa Elias vá'nga? jīte', Juan pasrra':

—Tyā'wēmeetj jīc.

Atsa' qui'quin pējytyi:

—Dyus yuwe pta'shsa' pa'jana jī'ty tyāa vá'nga jīte':

—Tyāameetj jīnac pas.

²²Tyājū' qui' pējytyi:

—Tyā'wērra' indya' ¿quimnga? Indya' quīj yūuna fi'nzesarrava mpeeta'sh. Tyā'wēme', cue'shtyi jycaasaty pta'shya' u'jwa'j jī'ptja'w jīte', ²³Juan pasrra':

—Dyus yuwe pta'shsa Isaiasa' na'jīnac we'we: Nasa u'pnimée quiwesu sus we'weni ptjūsena: Dyus pa'jwa'ja's mpjeu'jwe jīna, nava andy tuutje'jna pecūjwa'ja's pta'shnac tyā'jī.

²⁴Juana's paapējyya' pa'jsa' fariseowe'sh caajnisaty yu', ²⁵sa' qui'quin paapējytyi:

—Tyā'wē Cristomeetj, sa' Eliasva meetj, sa' Dyus yuwe pta'shsa pa'jana jī'ty tyāameetj jī'ng sa' ¿quījya'rráanga nasaty yu'te bautisai'? jīte', ²⁶Juan pasrra':

—Andya' yu'terráatj bautisai'. Nava i'cue'sh cshavyte teech ūsa' tyā'sa' jīimeene'cue. ²⁷Tyā' andy e'su vyaana, nava tyā' andyte jytjaacuesa'. Atsa' andya' tyajy pelgaty tundni wesrráa yujtyva cjjimbya' ājmeecuesatj jīnac pas.

²⁸Juana' Jordan yu'wala cuteju sec cāani ju'ngu Betábara yaasesatec tyā'wē bautisāyna ūsu', atsa' cyteety tyā'wē paapējyya' pa'jna ūsu'.

Cristo Dyus caajni piishacuē

²⁹Cuscuscjē' Juana' Jesus yujte uyrra', na'wēc we'we:

—Mtjengwe, naaí Dyus caajni piishacuē', jyucaysa pcaltyi tyundewa'jsa. ³⁰Atsa' andya' tyā'sna we'werratj tyā'wē pta'sh: Andy e'su teech pitstjē'j vyaana, tyā' andyte jytjaacuesa', tyā' naa quiwete andy upymeyna we'shcu yu' tyāa pa'ga. ³¹Tyā'sa' andyíi yuuva jīimeetj yu' quimteva. Nava Israelwe'sh tyā's jiyucajn yu'terráava bautisāyna ūsu'tj.

³²Juana' qui'quin we'wec na'jīna:

—Dyus Espiritu's uytju cieluju tumb chijme na'wēsa Jesus cajcucjē quiijatste. ³³Tyā'wēteva, andya' nee jīimée írráatj yu' quimteva. Nava andya's bautisāyya' caajsa' pta'shcu: Espiritu's uyuune'nga teech pitstjē'j cajcuete

quíijatste!, atsa! tyāa pitstjē'ja! isa Dyus Espiritu's nasaa ūuste cyu'acje'jsa yuuna jīnac pta'sh. ³⁴Atsa! āchja! uyrra!, jiyutj Dyus Nchi'cteva, sa! tyā'snatj tuutje'je!.

Cristo yacj u'jusa nyafytewe'sh

³⁵Vite cuscuscjē! Juana! qui! cytey ūsu'c tyāa yacj u'jusa e'nzsa yā'jrra.

³⁶Sa! Jesus jycjēuutste uyrra!, Juana! na'jīc:

—Mtjengwe, naaí Dyus caajni piishacuē!.

³⁷Tyā'jīni's wēse'jrra!, tyāa e'nzsa! Jesus e'stey u'jty. ³⁸Atsa! Jesusa! yu'tjengrra!, tyajy e'ste yuusaty uycu, sa! na'wēc pējy:

—¿Quíjcue pacué!? jīte!, tyāawe'sh pasrra!:

—Caapiya'jsa, ¿mteenga u'pu'? jīte!,

³⁹Jesus pasrra!:

—Mejcawe tjengya! jīc. Atsa! tyāawe'sha! u'jrra! jiyuty mtee u'psateva. Sa! tyāa yacj cytee neeyūuty, cusutsyā'cj yu! naa pa'ga.

⁴⁰Juan we'weni's wēse'jrra Jesus e'stey u'jsa teecha! Andrescu yaase yu!, Simon Pedro nyacj. ⁴¹Atsa! Andresa! tyajy nyacj Simon cjuē'yna nyafyte pta'shya! u'cj:

—Dyus tashu yuusa Cristo jīni's yuutja'w uy jīna.

⁴²Tyajū! Andresa! tyajy nyacj Simona's pe'jna cūjc Jesus ūsnite. Atsa! Jesus uyrra! na'jīc:

—Indya! Jonas nchi'c Simon yaaseng, nava āchja! Cefas yaseni neeyūune'nga. Cefas yu!, Pedro jīni!.

Felipe, Natanaelwe'shtyi Jesus pa'yani

⁴³Vite cuscuscjē! Jesusa! Galilea quiwen u'juetsrra!, Felipe's uyrra!:

—Andy yacj myuj jīnac pi'cy.

⁴⁴Felipe yu!, Betsaida chjambte u'psac yu!, Andres Pedrowe'shva tyāa chjambteywe'shtyi yu!. ⁴⁵Atsa! Felipe! Natanaela's pta'shya! u'jrra! na'jīc:

—Moisesa! teech pitstjē'ja! vyaana jīnac fi'j ley libroute, atsa! Dyus yuwe pta'shsa tyāniiteywe'shva tyā'snaírráaty tuutje'jna fi'j tyā'stja'w cue'sha! puuty uy. Tyāa pitstjē'ja! Jose nchi'c Jesusa!, Nasaret chjambtewe'sha! jīte!, ⁴⁶Natanael pasrra!:

—Nasarette!, ¿maarrá! nasa ewsa casejya! ājama'c? jīte!, Felipe pasrra!:

—Mejca vacy tjengya! jīc.

⁴⁷Tyajū! Natanael utyaana cūjutste Jesusa! uyrra!, na'jīc:

—Naa pitstjē'j yuurra! Israel nwe'sh jypumbasamée nasa ewsa yuj yu'ga.

⁴⁸Tyā'jīte!, Natanaela! pējyuc:

—¿Ma'wē yuurranga andya's jiyu? jīte!, Jesus pasrra!:

—Felipe pa'yameyna, indya's uytju higuera fytūu tashte u'pte jīte!,

⁴⁹Natanaela! na'wēc pas:

—Indya! Dyus Nchi'cngu, Israelwe'shtyi jycaajsa jīte!, ⁵⁰Jesusa! na'jīc:

—Tyā'wē higuera fytūu tashte u'pte indya's uytju jīterrāa ¿andy quimteva jiyuvá'nga? Tyā'wēyā'jrra!, naajūyā'ja! Dyus caavya'jal'njity wejy walasaty uyuune'nga jīc.

⁵¹ Sa' qui' we'werra':

—Andya' isatj we'we': cielu pjaaterra ũste', Dyus angeleswe'sha' quĩjna tejcana ũste uyuune'cue Dyus Nchi'c Nasa Yuusáa cajcucejê jïc.

Caná chjambte ptamunisa

2 ¹⁻³ Tecj en scjêwniite!, Galilea quiwesu Caná chjambte ptamusáa ũsu'ty. Atsa' Jesusva pi'cyni pa'jrra ũsu'c, tyāa yacj ij u'jusawe'sh yā'jrra. Jesus njĩ'jva cytee ũsu'c, naapcachja' vino ptsuute', Jesusa's na'jĩnac pta'sh:

—Vino ptsuc jïc.

⁴ Atsa' Jesusa' na'wêc pas:

—¿Quĩj yũucajncue andya's tyā'wê pta'shi'? andy en yuu ajmeya' jíte',

⁵ njĩ'ja' cytee selpisaawe'shtyi na'jïc:

—Tyāa ma'wê jycaatje!, cytey myũuwe jĩna.

⁶ Cyte' seis quiwe mityj walasaty ũsu'. Tyāa yu' judiuwe'sh cjweechawa'j yu' awnisaty yu'. Mityj iisa ochenta meerrava cien litro yu' cjêesaty yu'. ⁷ Tyajũ' Jesusa' jycaacj cytee selpisaawe'shtyi':

—Naa mityjsu jyuca yu' uta mawwe jíte!, cytey yuuty. ⁸ Tyajũ' Jesusa' na'jĩnac we'we tyāawe'shtyi': Naa mityjte le'chcuê pa'cyrra boda namu's me'jwe yusya' jíte!, tyāawe'sha' cytey yuuty. ⁹ Tyajũ' boda namu' tundyrrava, jiyume' yu'a's tyā'wê vino vitniteva. Cytee selpisaawe'shrráaty jii yu', yu'a's tyā'wê vino vitnisateva. Tyajũ' boda namu' ptamusa's pa'yarra ¹⁰ na'jĩnac we'we:

—Maava vino ewsa's cjuê'ytyi nyafyte yusu' pi'cynisaty, tyāa e'suty vino achamée ewsa's yusu'. Nava indya' tyā'wê yũumée vino wejy ewsa'sngu nmejte yus jïc.

¹¹ Jesusa' Galilea quiwesu Caná chjambtec tyā'wê quim yujva ajānimeesa's caavya'j. Tyā'wê yũurrac tyajy ewuni's cjiyu'j, atsa' tyāa yacj u'jusawe'sha' jiyuty Jesus quimteva.

¹² Tyāa e'su' Jesusa' Capernaum chjambnac u'j, tyajy njĩ'j vite' tyajy nyacjwe'sh, tyāa yacj u'jusawe'sh yā'jrra.

Dyuus yatte tyweyna ũssaty Jesus cashishni

(Mt. 21.12-13; Mr. 11.15-18; Lc. 19.45-56)

¹³ Judiuwe'sh fiesta Pascua en ajātste', Jesusa' Jerusalen chjambna u'cj. ¹⁴ Sa' dyuus yatte u'carra', buey, piisháa, tumb chijmety tyweyna ũstec uy, vite' vyuu yu'ptjejna ũssaty. ¹⁵ Sa' Jesusa' tyā'wê yũuna ũste uyrra!, cja'tya pjeu'jrra eca cashishcu nasa vite' niimaltyi jyuca. Sa' tyā'wêy vyuu yu'ptjejna ũsni mesatyva jyuca pũshcu pety vyu yā'jrra. ¹⁶ Sa' cytee tumb chijme tyweysaty' na'jïc:

—Naaty' ayjyu jyuca mcaashishwe. Andy Tata yatte' tyweyna vyuu yu'ptjejna ũswa'jme'.

¹⁷ Tyā'jíte!, Jesus yacj u'jusawe'sha' yajcytyi Dyus librute na'wê fi'jni's: Dyuus yatte' ewmée yũuni's wej yujva peejymeetj jĩni's.

¹⁸ Tyajũ' judiuwe'sha' ũuscha we'wenaty pějy:

—Quim jycaatje tyã'wě yũurrava, cue'shtyi mpeeta'sh jite!, ¹⁹Jesus pasrra!:

—Naa dyuus yata's pētyteva, andya' tecj ente' qui' quiiysa' ājāwaj'satj.

²⁰Tyājū' judiuwe'sha' iiveech we'wena na'jity:

—Naa dyuus yata's cuarenta y seis añutety tyajna jyā'j, atsa' indya' ħtecj enterrāa tyajya' ewuundyjīima'ng?

²¹Nava Jesusa' tyajy cacue'scu dyuus yata' jina we'we!. ²²Atsa' uurra qui' ityi yuute!, tyāa yacj u'jusawe'sha' yajcytyi tyā'wě we'weni's. Sa' Dyus libru' isane' we'we!, atsa' Jesusva isasa's írrāane! we'we' sūjna ewtyi jiyu.

Jesus nasaa ūus yaacynity jiyuni

²³Judiuwe'sh fiesta ente Jesus Jerusالente ūste!, nasa wala cuj jiyuty Jesusa' Dyus tashu yuusateva, tyā'wě quim yujva ājānimeesa's caavya'ja'pja'ga. ²⁴Nava Jesusa' tyāawe'sh ma'wēsateva jyuca jiiyā'cj yu!, tyāasac tyā'wě jiyuty sūju'tsmée. ²⁵Tyāa nasa' tyā'wēsata' jina pta'shi peejy yu'tsme!, tyāa pa'gatey nasaa ūus yaacynity jyuca jiiyā'cj yu' naa pa'ga.

Jesus, Nicodemo yacj puuty we'weni

3 ¹Teech fariseo Nicodemo yaasesa u'pu'c. Tyā' judiu npiitstjē'jsatewe'shcu yu!. ²Tyāa pitstjē'ja' Jesus tashte cus pa'rira!, na'jic: Jiitja'w indya's Dyusne' tyā'wě caaj, cue'shtyi caapiya'cjan. Dyus pu'chmeevatsa!, quim yujva ājāwaj'same's caavya'ja'lmeena, indy na'wēng yu' tyā's jite!, ³Jesusa' na'wēc pas:

—Isatj we'we!, maava qui' upymeerra yu!, Dyus jycaajna ūsnite u'caya' ājameena.

⁴Tyā'jite!, Nicodemo' na'wēc pējy:

—Nasa iishyā'jsa' ma'wě qui' upyya' ājacy? Njī'j tutyjte qui' u'carra upyya' ājama'c? jite!, ⁵Jesusa' pta'shcu:

—Andya' naa cacue upywa'ja's we'we'tsmeetj. Maava Dyus jycaanite u'ca wēerra!, yu'te vite! Dyus Espiritute upywa'ja'stju tyā'jī!. ⁶Nasaa cacue' nasaa cacueteyrrāac upyji!, naapcachja' Dyus luucha' Dyus Espiritutec upyji!. ⁷Maava qui' upywa'ja' jī'tj atsa' fiy yuj tyā'wě we'we'c sūjna yaacynu. ⁸Wejya'sva ma'wēga susni's wēse'jrrava, majū yujte qui' maa dyi'j u'juetsteva ya'jiyu'tsmée, tyā'wēycu Dyus Espiritute upyni's ya'jiyu'tsmée jite!, ⁹Nicodemo' jiyuya' ājameerra' qui' pējycu:


—ħMa'wě tyā'wě yuja' qui' ya'upyjicy? jite!, ¹⁰Jesus pasrra!:

—Indya' Israelwe'shtyi caapiya'jsarrava, na'wēsa yuutyi! ħjiimeevá'nga?

¹¹Isatj we'we!: Dyus Espiritute upynisa' wejya na'wēsarrá' tyā' ma'wēsateva iiyutju sa' jiirratj tyā'jī!. Nava i'cue'sha' jiyu'tsmeei'cue. ¹²Naa quiwetewe'shtyi we'wena pta'shte jiyumeerra!, ħma'wě jiyuqui'cue cielutewe'shna pta'shte'?

¹³Maa yujva cielute u'casa yu' meeta!, naasáa cielujū quīisa yuurrāa cielute u'casa!, Dyus Nchi'c Nasa Yuusáa tyā' cielutewe'sha' naa pa'ga.

¹⁴Dyus Nchi'c Nasa Yuusa's ēecjē a'cyrra qui'pni yuuna, Moisesva ma'wēga nasa u'pnimée quiwete ūsrra' ul weeswe's fytūucjē a'cyrra qui'p



(San Juan 3.2)

tyā'wēy, ¹⁵cyaj maava jyucay tyā'sna uyrra ūuste jypa'gasa', bagachte yujva ptsuwa'jmée ityi fi'nzewa'ja's ji'pjutyna vitumée.

Dyusa' nasaty iiméj wala peeygāani

¹⁶Dyusa' naa quiwete nasaty iiméj wala peeygārra yuurráac tyajy Nchi'c teehrráasanava naa quiwete caaj, cyaj maava tyā'sna ūuste jypa'garra' bagachte yujva ptsumée ityi fi'nzewa'ja's ji'pjucajn vitumée. ¹⁷Dyusa' naa quiwete tyajy Nchi'ca's caajrrava, nasaty ewmeete nvijtya' caajme', wejyva nwe'weya'c caaj. ¹⁸Maava Dyus Nchi'ca's ūuste jypa'gasa', ewteyā'j neeyūutyna. Nava tyā'wē Dyus Nchi'c teehrráasana ūuste jypa'gasame', ewmeeteyā'j neeyūuwa'jsata'. ¹⁹Maava ūuste jypa'gasame', ewmeeteyā'jty nviitni yu', tyā'wē eena'sa naa quiwete quijteva, ewmeerráa yūuna ūsrra', chji'ndyterráa wejy fi'nze wēepa'ga. ²⁰Sa' maava jyucay ewmeerráa yūuna ūssa', eena'sa's ajtserra utya'tsmeeta' eena'te,

tyāawe'sh ewmée yūuni āate vyaacajmen. ²¹Nava ew yūuna fi'nzesa yu' eena'sa's utya'ty, tyāawe'sh ew yūuni' Dyus jycaajnisateva āate vyaacajm.

Jesusa's tuutje'jni's wēse'jrra' Juan wechaní

²²Tyāa e'su' Jesusa' Judea quiwen u'cj tyāa yacj u'jusawe'sh yā'jrra. Sa' cyte' manz en ūsu'c nasaty yu'te bautisāyna. ²³Juanva bautisāynac ūsu' teech ajte Enon yaasesate Salim utyate, tyāa ja'ndasu yu' ūsu'c naa pa'ga. Atsa' Juana' nasa wala kuj yu'te bautisāycu. ²⁴Carcelte cyupmeynarrāac tyā'wē bautisāy.

²⁵Tyajū' judiawe'sha' Juan yacj u'jusawe'shtyi paapējtyty tyā'wē bautisāyni's. ²⁶Atsa' tyāawe'sha' Juana's pta'shtyi na'ljina:

—Caapiya'jsa, mwēese'j. Sec cāani ju'ngu Jordan yu'wala cutete ūste pta'shngu tyāa pitstjē'jva āchja' bautisāyna ūsa', atsa' nasa jyucay tyāa yacjrrarrāa u'ljuetsta' jite', ²⁷Juana' na'wēc pas:

—Quim yujva tyā'wē tuutje'jni yuumeena, Dyus jycaajnimēesa yu'. ²⁸I'cuel'sha' yatstey andy pta'shni's jiiyā'ji'cue: Andya' Cristomeetj, naasāa tyajy yatste caajnisarrāatj jīni's. ²⁹Naa ejemplo's mjiiyuwe: Ptamunte' novio' novia yacjcu u'pu'. Atsa' novio namicu' pucate u'prra' wala wechwecha yaaqui'c novio we'weni's wēse'jrra. Andyva tyā'wēytju wala wechwecha yaaqui', Jesusa's tuutje'jni's wēse'jrra. ³⁰Tyā' jweefírrāa tujtjesa yuuna u'juena, naapcachja' andya' jweefírrāa ājmecuesa yuuwa'tj.

Jesusa' cielujū quīisa'

³¹Cielujū quīisa' maateva jytjaacue tujtjesa'. Quiwete ūssa' naa quiwetewe'shta', sa' naa quiwetewe'shrrá'styi pta'shi'. Nava cielujū quīisa' maateva jytjaacue tujtjesa'. ³²Tyā'wērraíic tyajy wēse'jrra uyni's pta'shi', nava quim yujva nwēese'je'tsmeeta' tyajy we'weni's. ³³Nava tyajy pta'shni's maarrāava nwēese'jvatsa', Dyusa' isac pta'shi' sūjna jiyuna pa'jatyna. ³⁴Tyā'wē Dyus jycaajnisal' Dyus cwe'we'jni'scu we'we', tyā'sa' Dyusa' tyajy Espiritu's macueva ūsu'c tyāa pa'ga. ³⁵Neya' Nchi'ca's wendyrra quījnava jyuca tyajy cusete nvijtcu. ³⁶Atsa' maava Dyus Nchi'ca's ūuste jypa'gasa' ptsumée ityi fi'nzewal'ja's jil'pjutyna. Nava Dyus Nchi'ca's nwēese'jsame' ptsumée ityi fi'nzewal'ja's jil'pjumeetyna, naasāa Dyus castigo seena'sarrás' jypa'gawal'sata'.

Teech u'y Samariatewe'sh yacj Jesus puuty we'weni

4 ¹Tyā'wē Jesus tashte nasa wejy wala utyaate', Jesusa' Juante jytjaacue bautisāyni's fariseowe'sha' jiyuty. ²Isa yu' Jesusa' bautisai'tsme', naasāa tyāa yacj u'jusawe'shrrāaty bautisai'. ³Nava tyā'wē fariseowe'sh jiyuni's Jesus wēse'jrra', Judeajū casejna u'cj, Galilea quiwen. ⁴Nava Galilea quiwen u'ljuetsrra', Samaria quiwegac cjēwna u'l'jwa'j jil'pju'. ⁵Sa' Samaria quiwesu' teech chjamb Sicar yaasesa ūsa' tyāa chjamb peecu'tjec pal'j tyāa yacj u'jusawe'sh yā'jrra. Tyāa Sicar chjamba' Jacob quiwe ūscu tyajy nchi'c Jose's tyāa utyatec neeyū'. ⁶Tyāa quiwete' Jacoba' tyāniitey yu' cutyi'jni cafy

nviytna ūsu'ne!, atsa! Jesusa! ēepyāj wajytyna u'juetsrra!, cyteec jycaaseya! cach.
 7Naapcachja! teeche u'y Samariasuwe'sha! yu! pa'cyya! pa'tje!, Jesusa! na'ljic:

—Yu! mpeeswe tundywa'j.

8Tyāapcachja! tyāa yacj u'jusawe'sha! chjambna ū! weyya! u'jnity yu!

9Atsa! tyāa u'ya! na'ljinac pas:

—Indya! judiu nasang, sa! ꞑma'wētenga ū'cue's yu! tjāasu! ū'cue!
 Samariasuwe'shtju atsyuja! jic. (Judiuwe'sha! Samariasuwe'shtyi ajtserra
 we'we'tsrrāa yujva meeta!.)

10Tyajū! Jesusa! pta'shcu:

—Dyusa! quij ūsya'vateva jiyurra tyā'wēy yu! tjāassa! quimteva
 jiyuvatsa!, andya's yu! tjāasune'cue, atsa! andya! yu! ptsuwa'lmeesa's
 peesu'nja jite!, 11 tyāa u'ya! na'wēc pas:

—Naa cafya! wala dyiia!, atsa! indya! yu! pa'cywa'j ji'pjmeeng. Sa!
 ꞑma'wēnga ū'cue's yu! ptsuwa'lmeesa's peesu'nja ji'? 12 Cue'sh yatsgawe'sh
 Jacobcu naa cafya's pjaande yu! pa'cywa'j, atsa! tyajy nchi'cwe'shva cyteety
 pa'qui! tajcytyi yuswa'j vite! tyāawe'sh tundywa'j yā'jrra. Atsa! indya! ꞑcue'sh
 yatsgawe'sh Jacobte jytjaacue vāa walasane'nga? jite!, 13 Jesus pasrra:

—Jyucay maava ayte yu'a's tundysa! yū'wēena nes yuutyna. 14 Nava
 andy peesni yu'a's tundyrra!, bagachte yujva yū'wēemeetyna. Tyāa
 pa'gatey andy peesni yu'a! tyāawe'sh ūuste yu'itsj na'wē nes yuuna,
 ptsuwa'lmeē ityi fi'nzewa'ja's ji'pjucajn.

15 Tyā'ljite! tyāa u'ya! na'ljinac pas:

—Tyā'wēte!, tyāa yu'a's mpees, cyaj yū'wēevame'nja, sa! peena yu! naa
 cafyte pa'cyya! pa'ljme'nja.

16 Atsa! Jesus we'werra:

—I'cue nmi'a's me'jwe pa'yaya!, sa! tyāa yacj yuweene'cue ayte! jite!, 17 tyāa u'ya!:

—Nmi! ji'pjmeetj jīnac pas.

Tyajū! Jesusa! na'ljic:

—Nmi! ji'pjmeetj jīrra! isa yuj we'wei'cue. 18 Tyā'wē nyafii yu! tajts
 nmi'i'cue ji'pju!, nava āchwe'sha! nmi! me!, atsa! isa yuj we'wei'cue.

19 Tyā'wē wēse'jrra!, tyāa u'ya! na'ljinac pas:

—Indya! Dyus yuwe pta'shsaī ne'nga sūju'tj. 20 Cue'sh yatsgatjē'ljwe'sha! naa
 vitstety Dyusa's neewe'weya! pcjaacje!. Nava judiuwe'sh yu!, Jerusalenterrāa
 Dyusa's neewe'weya! pcjaacjewa'ja! ji'i'cue jite!, 21 Jesus pasrra:

—Ew mjyuwe: naa vitste meerrava Jerusalenterrāa Dyusa's
 neewe'wewa'lme!. Dyusa's mteeva neewe'wewa'j en ājana. 22 Samariatewe'sha!
 Dyusa's ma'wē neewe'wewa'ja'sva jiimeei'cue. Nava judiuwe'sha! jiirratja'w
 Dyusa's neewe'we!, nwe'wesa! judiu nwe'sha! naa pa'ga. 23 Dyusa's neewe'wewa'j
 en ājana ji'tj tyāa ena! ājyā'cj. Atsa! maava išhiimēe ūusuj jyuca yajcyrra Dyusa's
 ūusterrāa neewe'wesa! ew yuutyna, cue'sh Tata! tyā'wē yūuni'scu jytjāasu! naa
 pa'ga. 24 Dyusa! cue'sh na'wēy cacue ji'pjme! na! mtee mteeva ūsa!, atsa! tyā'sna
 neewe'wesa! ūusuj jyuca yajcyrra neewe'wewa'ja! jite!, 25 tyāa u'ya! na'wēc pas:

—Ũ'cue! jiitj Cristo Dyus tashu yujna, atsa' tyāa pa'jrra jyuca ew pta'shina jite!, ²⁶Jesus pasrra!:

—I'cue yacj puuty we'wena u'psa andyíi Dyus tashu yuusatj jic.

²⁷Naapcachja' tyāa yacj u'jusawe'sha' shawendna pa'jty. Sa' Jesusa' tyā'wē tyāa u'y yacj puuty we'wena ũste uyrra', cuj yajcynaty neeyūu. Nava ¿quijya'nga tyāa u'y yacj puuty we'we'? jina maa yujva paapēyi'tsmeeta'.

²⁸Tyajū' tyāa u'ya' mityja's cytee tyajna' u'cj chjamsu nasaty pta'shya':

²⁹—Naa quiwete ma'wē fi'nzeni'sva teeche pitstjē'j jiyuc tyā'sa' myujwe tjengya'. Tyā' Cristo ina jina pta'shte', ³⁰chjambtewe'sha' tjengya' u'jty Jesus ũsnite pa'j. ³¹Naapcachja' tyāa yacj u'jusawe'sha' Jesusa's na'jīnaty we'we':

—Indya', ¿wēemeengá'? Pan mē' jina.

³²Nava Jesusa' na'wēc pas:

—I'cue'sha' jiimeei'cue andy quīj ũ'wa'lj ji'pjteva.

³³Tyā'jite!, puuty paapēyi'ty tyāawe'sh pwe'sh:

—Merra' ¿maa nasa puutsya' cūjvá'ntacy? jina.

³⁴Atsa' Jesusa' na'wēc pta'sh:

—Andy Tata jytjāasra mjiya' caajni's cytey yuunirráa, andy ũ'ni na'wēsa'.

³⁵Ũ' tjē'jwa'lj pajnz a'tey peejya' ji'i'cue i'cue'sha'. Nava tyā'wēme!. Mjiinisu mtjengwe vacy, jyuca tjē'jniyā'lj ũsa', atsa' pcjajwa'jrrāa yā'lj peejya'. ³⁶Pcjajna mjiisa' deweni's jypa'gawa'lj ji'pja', atsa' tyāa pcjajnis'a' ptsuwa'jmée ityi fi'nzewa'jsata', cyaj uujsa' pcjajsa yacj ja'ndarraj wechwecha yajcyna neeyūutyna e'nzii. ³⁷Teechsa' uja'c, naapcachja' vite' pcjaj'e'c jini' isa yuja'. ³⁸I'cue'sha' uujsameei'cue, nava andya' pcjajya' caatj vite nasa uujnisu jic.

³⁹Tyā'wē tyāa u'y ũ'cue ma'wē fi'nzeni'sva jyuca jiyuc jina pta'shpa'ga, tyāa chjambte nasa cujsa' Jesusa's ũuste jypa'gaty. ⁴⁰Sa' Jesus ũsnite tjengya' pa'jrra', Jesusa's wala neevishaty tyāawe'sh yacj cytee pta'shna neeyūucajn. Atsa' e'nz encu cytee fi'nze, Dyus yuwe's pta'shna. ⁴¹Atsa' tyā's wēse'jrra', Jesusa's ũuste jypa'gasa' jweeírráaty pejna. ⁴²Sa' tyāa u'ya's na'wēty we'we':

—I'cue pta'shnirrá's jiyumée, cue'sh yuutja'w tyajy we'weni's wēse'jrra jiyu Dyus tashu yuusa Cristoteva, maatyva jyuca nwe'wesa.

⁴³Tyajū' e'nz en scjēwniijū', Jesusa' Samariajū casejna u'cj Galilea quiwení. ⁴⁴Jesusíi we'werrava: Dyus yuwe pta'shsa' maa yujva peecy quiwete yu' wendyni fi'nze'tsmeeta' jic tyāasac Galilean u'j. ⁴⁵Atsa' Galileate pa'tje', cyteewe'sh yu' wala wechana jypa'gaty, Jerusalen fiestan u'jsa' uyne'ta Jesusa' ma'wē yūuteva tyāasaty tyā'wē yūu.

Teech ātsā'sa's Jesus nuycatyjini

⁴⁶Jesusa' Galilea quiwete pa'cj Caná chjambte, yu'a's vino vitcu nyaffi cytee. Atsa' cytey teeche pitstjē'j ũsu'c ne'jue'sha's jycaaj pu'chsa. Tyā' teeche nchi'c wala ātsā'sa' ji'pju'c Capernaum chjambte. ⁴⁷Sa' Galileatey Jesus shawendna pa'jni's jiyurra', tyāa pitstjē'ja' puuty uyna cūjrra', na'jīnac pytjaa we'we':

—Andy yatna mejca, andy nchi'ca's nuycatyjiya'. Tyā'wēme!, uutsyā'ja' jīte!, ⁴⁸Jesus pasrra':

—I'cue'sha' andy ājani's caavya'ja'jmeete yu', andya's jiyumeene'cue quimteva. ⁴⁹Tyā'jīte!, tyāa pitstjē'j yu' na'ljīc:

—Dund myuj, andy nchi'c uumeyna.

⁵⁰Tyājū' Jesusa' na'ljīc:

—Yatna shawendna me'j. Iindy nchi'ca' catyjiyā'jrra ūsa'.

Tyā'jīte!, tyāa pitstjē'ja' Jesusa' isa yuj we'wene' sūjna yatna shawendna u'cj. ⁵¹Sa' yatte pa'jatste!, tyā'sna selpisaawe'sh pu'tjengya' casejrra' na'wēty pta'sh:

—Iindy nchi'ca' catyjiyā'cj jīna pta'shte!, ⁵²tyāa pitstjē'ja' pējyuc:

—Andy nchi'c ātsā'sa' ¿ma'wēnga wētcuē' yajcy? jīte!:

—Jū'na la unatec cacuesec ūchja jīnaty pta'sh. ⁵³Atsa' neya' yajcyuc tyāa oratey Jesusa': Iindy nchi'ca' catyjiyā'jrra ūsa' jīni's. Tyājū' tyāa pitstjē'ja' Jesus quimteva jiyurra' tyajy ūuste jypa'gac, yattewe'shva tyā'wēy. ⁵⁴Tyā'wē Judeajū shawendna Galileate pa'jrra ātsa'sa's nuycatyjini yacja' e'nz usyā'ja' Jesus ājani's caavya'ja'jni'.

Treinta y ocho año ātsā'na ūssa's Jesus nuycatyjini

5 ¹Tyāa e'su' judiuwe'sh fiesta en ājatscu yu', atsa' Jesusa' Jerusalenna qui' u'cj. ²Tyāa chjambte' iicja'jni yu' jī'pju'ty piishāa ca'ga'jni vity utyate. Tyā' Betesda yaase' hebreo yuwete. Ātsa'sa pa'jrra ūswa'j tajts ajtec tyundeni yu', yat pwa' na'wēsa. ³Cyte' wala kuj ātsa'sa ūsu'ty, uyya' ājasamée, chinda puuplesa, vite' ēseyā' ājasamée tyā'wēsaty ūytjasna ūsu', yu' ēsetspcachja' cytee cjēeya' sūjna. ⁴Tyā'wē maa enteya' Dyus angel quījrra yu'a's quēese'je'c, naapcachja' maa yatste cjējena tyā' jyuca catyjiirrac neeyū' quīj wee jī'pjrava. ⁵Cyteea' teech pitstjē'j treinta y ocho año ātsa'na ūssac tycaa ūsu'. ⁶Atsa' tyā'sna Jesus uyrra' tyacue tyach ātsa'na ūste jiyurra', pējyuc:

—¿Catyji wēenga'? jīte!, ⁷ātsa'sa pasrra':

—Yu' ēsetspcachja' yu'te andya's acjwa'jsa quim yujva meeta'. Andy cjēe wējetspcachja' vite cjuē'y cjēje'ty jīte!, ⁸Jesusa' na'ljīnac jycaaj:

—Quiiterra iindy pusrra deeni's tū'srra me'j jītspcachja', ⁹naa dundtey tyāa pitstjē'ja' catyjiyā'jrrac neeyūu. Sa' tyajy pusrra deeni's tū'srra u'cj.

Nava judiuwe'sh qui'sni ente tyā'wē dee pusni's tū'srra u'ljuetste uyrra', ¹⁰judiuwe'sha' na'wēty pējy tyāa pitstjē'j catyjisa's:

—Āchja' qui'swa'j ena' atsa' tyā'wē tū'srra u'juwa'j jī'pjmee'ng jīte!, ¹¹tyāa pitstjē'ja' pasrra na'ljīc:

—Andyna nuycatyjisa'ic tyā'wē jycaaj: Iindy pusrra deeni's tū'srra me'j jīpa'ga tyā'wē tū'srra u'ljuetstju.

¹²Atsa' judiuwe'sha' qui'quin paapējytyi:

—Tyā'wē jycaajsa' ¿quimga yu'? jīte!, ¹³tyāa pitstjē'j catyjisa' jiyuya' ājame' quim tyā'wē nuycatyjiteva. Cyteea' nasa wala kuj ūste!, tyāa catyjisa' jiimeec yu' maa dyi'j casejrra Jesusa' u'tjeva.

¹⁴Tyāa e'su' Jesusa' dyuus yatte tyāa pitstjē'j catyjisa's puuty uyrra', na'jīc:
—Āchja' catyjngu neeyūu na', naa weete jytjaacue ñussa pa'cjamen pa'yajcy
mfi'nze, ewmée yūuna u'jumée jīte', ¹⁵tyāa pitstjē'j u'jrra' judiuwe'shtyi pta'shcu:

—Andyna nuycatyjisa' Jesusga yu' jīna. ¹⁶Tyāa pa'gaty judiuwe'sha'
Jesusa's ajtserra icj wēe, qui'sni ente tyā'wē ātsa'sa's nuycatyjipa'ga.

¹⁷Tyajū' Jesusa' judiuwe'shtyi na'wēc we'we:

—Andy Tata' naa enteva mjiina ūsa', tyāa pa'gatj andyva mji'.

¹⁸Tyā'jīte', judiuwe'sha' jweefirráaty Jesusa's icj wēena quiite. Tyā'wē
qui'swa'ja' jīna jycaajni leyrrá's nwēese'jmée andy Tata' Dyusa' jī'c na'
tyāava Dyus na'wēysatj jī'ne' sūjrraty tyā'wē icj wēena quiite.

Dyusa' Nchi'ca's ityi vit-ya' ājawa'ja's ūsni

¹⁹Tyajū' Jesusa' na'wēc pta'sh:

—Isatj we'we', andya' Dyus Nchi'ctju, nava andyrráa yu' mjiya' ājame'nja.
Andy Tata ma'wē mjiite', tyajy mjiini's tjengrra yuurráatj tyā'wēy mjiya' āja.
²⁰Tyāa pa'gately Tata' andya's peeygājrra tyāa quīj mjiitsrrava jyuca pta'shi'c
andya's. Tyāasa āchj uyi'cue tyāate jweefirráa walasaty caavya'ja'jana, atsa' tyāaty
uyrra' i'cue'sha' cuj yajcyna neeyūune'cue. ²¹Tata' ma'wēga uusaaty ityi vitu',
tyā'wēy andyva ityi vitu'nja maatyva. ²²Āchja' Tata' yuuwesaty castigāywa'ja's
jyuca andyrrarráanac nvijt, tyāasa āchja' yuuwesaty castigāywa'ja's Tata' quim
yujtyva tjengwa'jsame'. ²³Tata'sva ma'wēta nwēese'je', tyā'wēy andynava
jyucaysa nwēese'cjancu tyā'wē yūu. Andyna nwēese'jsame' andyna caajsa
Tata'sva nwēese'jsameerra tyā'wē yuutyna. ²⁴Isatj we'we': Maava andy pta'shni's
jypa'yajcy wēse'jrra andyna caajsa's ūuste jypa'gasa', bagachte yujva ptsumée ityī
fi'nzewa'ja's jī'pjutyna. Tyā'wē yūusa' ewmeete nviitni yuumée, uuwa'ju cutyi'jrra
bagachte yujva ptsumée ityi fi'nzewa'tje nviitnisa yuuna. ²⁵Isatj we'we': Ptsumée
ityi fi'nzewa'j en pa'jana jī'tj tyāa ena' āchjūa'. Atsa' uusaawe'sha' Dyus Nchi'c
we'weni's wēse'jrra cytey yuusá' ityi fi'nzewa'ja's jī'pjutyna. ²⁶Tyāa pa'gately andy
Tata' ityī vit-ya' ājawa'ja's jī'pja', sa' andynava ūscu tyā'wē ityi vit-ya' ājawa'ja's.
²⁷Sa' yuuwesaty castigāywa'ja'sva andya'sfirráac ūs, andya' Dyus Nchi'c Nasa
Yuusatj naa pa'ga. ²⁸Tyā'wē Dyus Nchi'c we'weni ptjūusetel', uusaawe'sha'
pendaniijū casejwal'j en pa'jana jīna pta'shte', fiy yuj we'we'c sūjna yaacynuwe.
²⁹Tyāa en ājte', uusaawe'sha' pendaniijū ityi yuurra casejetyna, ew yūuna fi'nzesa'
ewte u'jya', naapcachja' ewmée yūuna fi'nzesa' ewmeete u'jya' ityi yuutyna.

Jesus quimteva caajiyu'jsa

³⁰Andyrráa yu' quijya'va ājame'nja. Andy Tata jycaatjerráatj yuuwesaty
castigai'. Andy ūuste peecyrráa yajcyrra tyā'wē yu'tsmeetj, tyāasa andy
castigāyni' isasata'. Andyna caajsa ma'wē jytjāaste' tyāarrá'stju cytey yu'.

³¹Andy ma'wēsateva quimva pta'shwa'jsa jī'pjmée peecyrráa tyā'wēsatj jīte', isa
yujna sūjwal'ja's ya'jī'pju'tsme'. ³²Nava tyā'wē ājawa'jsa yuja' jīna andy ju'ngu
we'wesa ūsa', atsa' andya' jīitj tyajy we'weni' isasa yuja'. ³³I'cue'sha' Juan tashte

paapējyya' caaji'cue, atsa' tyā' isa yuj pta'shcu andy quimteva. ³⁴Andya' naa quiwetewe'sh andy ju'ngu we'weni's peejymetj. Nava i'cue'sha' Juan pta'shni's jiiyā'jrra', tjēymée ewte neeyūuwa'ja's pacuecajnrráatj tyā'jī. ³⁵Juana' eena'te caaf'l'nze'jwa'jsa's tuutje'jsac yu', atsa' i'cue'sha' wa'lmée i'cue Juan pta'shni's jypa'gana ūsu' manz enrráava. ³⁶Nava andyna tuutje'jna isa pta'shsa yu' manzva ji'ptju, Juan pta'shnite jytjaacuesa. Andy mjiini' andyna tuutje'jna isa pta'shsata'. Na'wē mjiitj nava andy Tata jycajjnirráatytyu tyā'wē yu', Dyus caajnisá yuj yu'ne' sūjcajn. ³⁷Tyā'wēy andyna caajsava isac pta'shi' andya's tuutje'jna. Tyā'wēteva, i'cue'sha' bagachte yujva tyajy we'weni's iiwēse'jmeene'cue, sa' tyā'sa' iuiyvameene'cue. ³⁸Sa' tyajy caapiya'jni'sva i'cue'sh ūste ji'pjmeene'cue, tyāasa i'cue jypa'gaya' ājā'tsmée, andya's Tata caatjeva. ³⁹I'cue'sha' jypa'yajcy i'cue leei', psumée ityi' fi'nzewa'ja's ji'pjuya'. Atsa' tyāa libru' andya's pta'shsafírrá'. ⁴⁰Macue tyā'wērrava, i'cue'sha' andy tashte utya'tsmeei'cue ityi' fi'nzewa'ja's ji'pjuya'.

⁴¹Naa quiwete nasa andya's tuutje'jni's jytjāasu'tsmeetj. ⁴²Andya' i'cue'shtyi ew jiiitj, i'cue'sha' Dyusa's wendyi'tsmée i'cue. ⁴³Tata caatje' yuwe'tj, nava i'cue'sha' andya's jypa'ga'tsmée i'cue. Nava Dyus caajnisamée vite pa'jvatsa', tyāa yu'sa' jypa'game'cue. ⁴⁴¿Ma'wē yūurra andya's jypa'gaya' ājaqui'cue, nasaa pwe'sh puuty ew tuutje'jnirráana jytjāasrra, Dyus teechrráasa tuutje'jni yu'sa' jypa'gameerra'? ⁴⁵Andy Tata tashte i'cue'shtyi ewmée yuwe ūswa'jsana sūjuv'á'cue andya' tyā'wēmeetj. Tyā'wē i'cue'sh ma'wēsateva andy Tata tashte pta'shsa' Moisesírrá', i'cue'sh nacue wala ewrráa we'we'i'cue tyāa. ⁴⁶Moises we'weni's jiyuvatsa', andya's jypa'game'cue, Moisesa' andynaírráac tuutje'jna fi'l'j naa pa'ga. ⁴⁷Nava tyajy fi'l'jni's jypa'gameerra', ¿ma'wē andy we'weni's jypa'gaya' ājaqui'cue?

Cinco mil nasaty Jesus sāl'jīni

(Mt. 14.13-21; Mr. 6.30-44; Lc. 9.10-17)

6 ¹Tyāa ensu' Jesusa' Galilea ícj cuten u'cj, tyāa ícja's Tiberias jī'ty. ²Tyā'wē naa quiwete quim yujva vit-ya' ājanimeesa's caavya'ja'jna ātsa'satyva nuychjāchjapa'ga, nasa wala cuj pcjaacjena Jesus e'stey u'jty. ³Atsa' Jesusa' tjā'l'j vitsna u'jrra cytee cachcu tyāa yacj u'jusawe'sh yā'jrra. ⁴Tyajū' Judiuwe'sh fiesta Pascua en ājatscu yu' tyāa ensu'. ⁵Atsa' nasa wala pcjaacjena yujte uyrra', Jesusa' Felipe's na'jīnac pējy:

—¿Mtee ū' weyuucytja'w nasa jyucaysaty puutswa'l'j?

⁶Nava Jesusa' Felipe ma'jīteva jiyuya'rráac tyā'wē pējy, ma'wē yūuwa'ja'sva jyuca jiiyā'jrrava.

⁷Atsa' Felipe' na'wēc pas:

—Dos cientos peso pan weyrra jyucaysaty pe'ltenderra peesu'svatsva, ājmeena jīte', ⁸Jesus yacj u'jusa Simon Pedro nyacj Andresa' na'wēc pta'sh:

⁹—Ayte teech cuē e'nz wendy tajts cebada pan ji'pjsa ūsa'. Nava cyanzrráasa yuja' ¿ājma'c? jīte', ¹⁰Jesusa' tyāa yacj u'jusawe'shtyi': Mcaachi'l'jwe jyucaysaty jīnac jycaaj. Atsa' cinco mil pitstjē'jsa

cyaanzcuēesay tyacsu cachna scjēwtyi. ¹¹Atsa' Jesusa' pantyi' jypa'garra', Dyusna wechana'va tyāa yacj u'jusawe'shtyi ūsu'scu. Atsa' tyāawe'sha' cyaanzcuēesaytyi puutsna scjēwtyi sumbapcach. Wendynava tyā'wētyi yūu, macue ū'rrava tyicpach.

¹²Tyajū' jyucaysa tyicna scjēwte!, Jesusa' jycaacj tyāa yacj u'jusawe'shtyi!:

—Jyuca mepcjacjwe pe'la quiyasaaty! quījva vitucajmen jīte!, ¹³doce canastate utaty pcjacj tyāa tajts cebada pan quiyasaaty!. ¹⁴Tyā'wē Jesus yuurraa maa yujva ājanimeesa's vitte uyrra', nasa' na'wēty wechana we'we:

—Naa yuurra' isa Dyus yuwe pta'shsa yuj yu'ga, naa quiwete pa'jana jī'ty tyāaga yu' jīna wecharra', āandyijimée jycaajwa'jsa qui'pya'vaty yu'. Atsa' Jesus jiyurra', ¹⁵tyāarrāa tyuteena u'cj tjā'j vitste pa'j.

Īcj cajcuega Jesus u'juni
(Mt. 14.22-27; Mr. 6.45-52)

¹⁶Chji'ndyna quīinite!, Jesus yacj u'jusawe'sha' ĩcj pucate quījrra, ¹⁷barcote cjēena'va ĩcjuy ctejcana u'jty Capernaumte pa'jya!. Tyā'wē jyuca chji'ndyni yā'tjeva Jesusa' shawendna quījmeyna, ¹⁸barco ĩcjuy u'juetspcachja!, wejyaa wala quiiterra ĩcja's seena' wala quēese'cj.



(San Juan 6.9)

19 Tyā'wē seena' yuuststeva ĩcj pyājsu jyu'j u'juetsrra', Jesusa's ĩcj cajcuesu yujte uytyi, sa' wala ũucjtyi. 20 Atsa' Jesusa' na'wēc we'we:

—Ũucjnuwe, andytju jĭte!, 21 wala wechana jypa'gaty barcote. Sa' yaacynimeete naa dundtey ĩcj cutete pa'jty.

Nasa' Jesusa's pacuení

22-24 Cuscuscjē' Jesusa' cytee meeyā'tje!, tyāa yacj u'jusawe'shva meete!, nasa' barcote cjēena' u'jty Capernaum chjambna Jesusa's pacueya'. Tyā'wē Jesus yacj u'jusawe'sh teech barcote cjēerra u'tje!, Jesus yu' tyāawe'sh yacj u'jmeeteva jiyurraneta pacueya' u'jna ũsu' ĩcj cuteju nasa neeyūusa'. Jesusa' Dyusna wecharra pan puutsu tyāa ja'ndate barco pa'jne'ta Tiberias chjambuj yuusa, atsa' tyāatety cjēerra pacueya' u'j.

Ũ' cielujū quīisa

25 Sa' ĩcj cutete pa'jrra Jesusa's uyrra pējtyti:

—Indya' ¿ma'wēnnga ayte pa'j? jĭte!, 26 Jesusa' na'wēc pas:

—Isatj we'we!, i'cue'sha' pana's tyicpcach ũ'rrarrāa i'cue tyā'wē andya's pacué!. Nava andy tyā'wē maa yujva ājanimeesa's vittju tyā's yu' jiyurra tyā'wē yu'tsmeel'cue. 27 Tyic ũ'rra fi'nzewa'jrrá's pacuewa'jme!, wejyva ũ' bagachte yujva ptsumée ĩtyi caafi'nze'jwa'jsa's pacueewa'ja!. Atsa' Dyus Nchi'c Nasa Yuusa' tyā'wē ptsumée ĩtyi fi'nzewa'ja's ũsu'nja, tyā'wē yūuwa'ja's andy Tata' ũscu naa pa'ga jĭc. 28 Tyā'jĭte!, na'wēty pējy:

—¿Ma'wē yūucytja'w Dyus jycaajnityi' cytey yuuna fi'nzeya'? jĭte!, 29 Jesusa' pta'shcu:

—Dyus jycaajnityi' cytey yuu wēerra!, andya's mpa'gawe, andya' Dyus caajnisatj naa pa'ga jĭc.

30 Atsa' qui'quin pējtyti:

—Indya' Dyus caajnisane'nga sūjna cue'sh ew jiyucajn āchja' ¿quīj caavya'ja'jya'vanga? 31 Cue'sh yatsgawe'sh manteywe'sha' nasa u'pnimée quiwesu ul'jurra, ũ' maná yaasesa's ũ'ty. Atsa' tyā'wē yūuni's Dyus librute na'wēc we'we!: Dyusa' cielujū ũ'a's puutsu jĭ'c. 32 Atsa' tyā'jĭte!, Jesusa' na'wēc pas:

—Isatj we'we!, cielujū ũ'a's Moises puutsme!. Cielujū ũ'a's andy Tata' puuts. 33 Atsa' Dyus puutsni ũ' cielujū quīisa' naa quiwetewe'shtyi ptsumée ĩtyi caafi'nze'jwa'jsa'.

34 Tyā'jĭte!, na'wēty pējy:

—Cue'shtyi jype'jsa, cielujū quīisa ũ'a's pejca puutsune'nga cue'shtyiva jĭte!, 35 Jesusa' pta'shcu:

—Ũ' ĩtyi caafi'nze'jwa'jsa' andytju. Atsa' maanzcuēesava andy tashte pa'jsa' bagachte yujva wēemeetya. Sa' tyā'wēy andyna ũuste jypa'gasa' peena yu' yū'wēemeetya. 36 Andya' quimrrava i'cue'shtyi pta'shyā'tj, nava i'cue'sha' macue uyrrava, andya's cielujū quīisana sūju'tsmée i'cue. 37 Macue i'cue'sh yu' andya's jypa'gameeteva, andy jype'cjan Andy Tata ducjniasawe'sh yu' jyucaysa andy

tashterráa pa'jatyna. Atsa' maava andy tashte pa'jsatyí' ajtsemée wechana jypa'ga'nja. ³⁸Tyā'wē cielujū quijrrava peecy andy ūus yaacynírrá's cytey yuuya' yuwe'tsmeetj. Andy Tata ma'wē yūucaatje' tyā'srráanaty cytey yuuya' yuwé'. ³⁹Andy Tata' andy jype'cjan ducjnisyatyí' teechrráa yujva iviitu jytjáasu'tsme', cyají andya' nmej ente' qui' ityi vitu'nja. ⁴⁰Andyna caajsa jytjáasni' na'wé': maava jyucay Dyus Nchi'ca's ūuste jypa'gasa' ptsumée ityi fi'nzewa'ja's jipju jytjáasu'c. Tyāa pa'ga tyā'wē ūuste jypa'gasatyí' andya' nmej ente' qui' ityi vitu'nja.

⁴¹Tyā'wē andyíi ū' cielujū quíisatj jīpa'ga judiue'sha' Jesusa's atsewe'weya' tacjtyi:

⁴²—¿Naa pijtsíi Jose nchi'cmeená'? Sa' ¿ma'wēga cielujū quíisatj jīna we'we'? Tyā'jicajmeníi cue'sha' tyajy neywe'shtyi ew jii'tja'w.

⁴³Tyajū' Jesusa' tyā'jīni's jiyurra', na'wēc we'we:

—Maa yujva tyā'wē atsewe'wen ūswa'j jipjmeei'cue. ⁴⁴Andya' Tata jycaajnisatj atsa' tyāaíi andy tashte cuutya'tje yuurráa tyāatyí' jyucaysaty nmej ente' ityi vitu'nja. ⁴⁵Tyā'wē yūuwa'ja's Dyus yuwe pta'shsa libru'te na'wē fi'jni ūsa': Dyusa' caapiya'ljana jyucaysaty ¿jī'tsmeená'? Cyají maava andy Tata caapiya'jni's wēse'jra tyajy jycaajny cytey yuusa yuurráa andy tashte pa'jatyna.

⁴⁶Maa yujva Dyusa's iuumeeta'. Andy yuurráa Dyus tashu yuusatj na' tyā'sna iuytju. ⁴⁷Andya' isatj we'we': Andya's jypa'gasa' ptsumée ityí fi'nzewa'ja's jipjutyna, ⁴⁸tyāasa ptsumée ityí caafi'nze'jwa'jsa ū'a', andytju. ⁴⁹Cue'sh yatsga manteywe'sh nasa u'pnimée quiwesu u'jorra' maná yaasesa's ū'rrava, pejca uu ena's jipjutj. ⁵⁰Nava andya' cielujū quíisa ū'a'stju pta'shi', tyā'sna ū'rra' uucajmen. ⁵¹Andyíi cielujū quíisa ū' ityisatj. Maava tyāa ū'a's ū'sa', bagachte yujva uumée ityi fi'nzewa'ja's jipjutyna. Atsa' ū' andy ūsu'nja tyā' andy cacue', cyaj maa nasava ptsumée ityi fi'nzewa'ja's jipjucajn tyā'wē andy cacue's ūsu'nja.

⁵²Tyā'jīte', judiue'sha' na'wēty puuty ya'paapēyi':

—Naa pitstjē'ja' ¿ma'wē tyajy cacue's cue'shtyi puutsya' ājacy? jīte', ⁵³Jesusa' na'wēc pta'sh:

—Andya' isatj we'we': Dyus Nchi'c Nasa Yuusáa cacue's ū'rra tyajy eenava tundymeerra yu', ptsumée ityi fi'nzewa'ja's jipjumeene'cue.

⁵⁴Atsa' maava andy cacue's ū'rra andy eenava tundyrra yuurráa ptsumée ityi fi'nzewa'ja's jipjutyna, cyaj tyā'wē yūusatyi' andya' nmej ente' ityi vitu'nja. ⁵⁵Tyāa pa'gatey andy cacue' peena yu' cwēje'jmeena, atsa' andy eeva peena yu' cyū'wē'jmeena. ⁵⁶Maava andy cacue's ū'na tyā'wēy andy eenava tundysa', bagachteva andy yacj ij ūsuna, atsa' andyva tyāa yacj ij ūsu'nja. ⁵⁷Tata' andyna caacj tyā' ityísa'. Tyāa pa'ga andyva ityísatj. Atsa' andyva Tata yacj ma'wē ityísatca'w, tyā'wēy ityí fi'nzewa'ja's jipjutyna maava andy cacue's ū'sa'. ⁵⁸Cielujū quíisa ū'a'stju pta'shna we'we'. Cue'sh yatsgawe'sh manteywe'sha' maná yaasesa's ū'rrava pejca uu ena's jipjutj. Nava naa ū'a' tyāa maná na'wēsame'. Maava naa ū'a's ū'rra', bagachte yujva ptsumée ityí fi'nzewa'ja's jipjutyna jīnac pta'sh.

Jesus we'weni' psumée ityi caafi'nze'jwa'jsa

⁵⁹Jesusa' tyā'wēc pta'sh Capernaumte judiuwe'sh pjaacjenite. ⁶⁰Atsa' tyā'wē caapiya'jni's wēse'jrra', tyāa yacj u'jusawe'sh maaíi yu' na'wēty we'we tyāawe'sh pwe'shrráa:

—Na'wē pta'shni!, wala tjēya' jiyuwa'j, atsa' ma'wē yujva ya'jiyu'tsme!.

⁶¹Nasa jiyumeerra cuj jwend we'wena ūste Jesusa' jiyurra', na'jíc:

—Andy pta'shni's jiyumeerra ūscha yaaqui'vá'cue. ⁶²Tyā'wē jiyumée ūsrrava, Dyus Nchi'c Nasa Yuusa' cielun teecatste uyrra', ¿maa sūjuqui'cue? ⁶³Na'jī'tj na': Dyus Espiritu' ityi caafi'nze'jsa', atsa' tyāarrá'stju we'wena pta'shi!, naa quiwete ū'rra ityi fi'nzeni's pta'shi'tsmeetj. Andya' isatj pta'shi' Dyus yacj ityi fi'nzewa'ja's. ⁶⁴Nava maaíi yu' isane' pta'shi' sūju'tsmeei'cue jíc.

Jesusa' dyiicjēy jiyā'cj yu' maa tyā'wē atsetsteva, sa' quim icjcajn ducjwa'jsateva, tyāa pa'gac dyiicjēy tyā'jīna we'we.

Sa' qui' we'werra!:

⁶⁵—I'cue'sh maaíi yu' atsetste jiirratj andy Tata cuutya'tje yuurráa tyāawe'sha' andy tashte pa'jatyna jīna we'we.

⁶⁶Jesus tyā'wē pta'shterráa, tyāa yacj u'jusawe'sh maaíi yu' tyuteena u'jty. ⁶⁷Tyajū' Jesusa' pējycu docesaty:

—¿I'cue'shva andya's tyuteerra u'jya'vacue'? jīte!, ⁶⁸Simon Pedro' na'wēc pas:

—Cue'sha' ¿quim yacj u'juhecyta'w? Indy yuurráa psumée ityi fi'nzewa'ja's pta'shna ūsngu atsa'. ⁶⁹Tyāa pa'gatey cue'sha' indya's jiyutja'w, tyāasatja'w indya' Cristo, Dyus ityisa Nchi'cne'nga sūju'.

⁷⁰Tyā'jīte!, Jesus we'werra!:

—Andya' i'cue'sh docesaty tyjityjrra pa'yateva, teechna' echtjē'j jīia' jīnac pta'sh.

⁷¹Jesusa' Simon nchi'c Judas Iscariote's we'werrac tyā'jī, Judas tyā'wē docesatewe'shrrava Jesusa's icjcajn ducjya'vac yu' naa pa'ga.

Jesusa' Dyus Nchi'cna sūju'tsmeeta' Jesus nyacjwe'sha'

7 ¹Tyajū' Jesusa' Galilea quiwesuc u'ju'. Judea quiwesu yu' u'ju wēeme', cyteea' judiuwe'sh icjya' pacuenaty ūsu' naa pa'ga. ²Judiuwe'sh fiesta wa' vitni en ājatscu yu', ³atsa' Jesus nyacjwe'sha' na'wēty we'we:

—Ayte ūsmée Judea quiwen me'j, cyaj nasa iindy ju'nguj ūssawe'sh uyuutyna indy na'wē yū'ng tyā'sa's. ⁴Maava āate tuutjē'j jytjāasutsrra', paatssu ul'jumeena. Na'wē quimva ājanimeesa's caavya'ja'ng na' tyāatyī āate mcaavya'j maava uycajn jīnaty we'we!.

⁵Nyacjwe'shīi yujva Dyus Nchi'cna sūju'tsmeene'ta, tyāasaty ūste jypa'gameerra' tyā'wē we'we.

⁶Tyajū' Jesusa' na'jīnac pta'sh:

—Andy u'jwa'j ena' ājmeya', nava i'cue'sh yu' quīj enteva u'jya' ewurráane'cue. ⁷Naa quiwetewe'sha' i'cue'shtyi' atse'tsmeeta', nava andya's atse'ty, tyā'wē tyāawe'sh ewmée yūuni's āatetj pta'shi' tyāa pa'ga.

⁸I'cue'sha' fiestan me'ljrráawe. Andya' yujme'nja, andy u'ljwa'j en äjmeya' atsa'.

⁹Tyã' we'werra', Jesusa' Galileatee neeyüuc.

Jesus fiestan u'jni

¹⁰Nava tyajy nyacjwe'sh u'jni e'su', Jesusva fiestan u'cj, quimva jiyunimeete. ¹¹Atsa' judiwe'sha' na'ljinaty tyãa fiestate Jesusa's pacuena üsu'!

—¿Mtee üsqui tyãa pitstjê'ja'? jina.

¹²Tyãa fiestate' Jesusa's nuywe'wesa yuurráaty susna üsu'. Vitefi yu': Jesusa' ewsa yuja' jitspcachja', vite yu': Ewmeesa', nasaty i'shiina u'jusarrá' jínaty nuywe'we'.

¹³Nava Jesusa's ew we'wesa yu' maa yujva äate yu' we'wetsmeeta', judiwe'shtyi üucjrra.

Fiesta ente Jesus caapiya'jni

¹⁴Fiesta ptsuuna u'juetspcachja', Jesusa' dyuus yatte u'carra caapiya'jya' tacjcu. ¹⁵Atsa' judiwe'sha' cuj yajcynaty üsu' tyãawe'sh pwe'shrráa na'ljina:

—Naa pitstjê'ja' ¿ma'wërra tyacue wala jiina, maa caapiya'jsa yacj yujva u'jusameerrava? ¹⁶Atsa' tyã' we'weni's jiyurra', Jesusa' na'ljinac pta'sh:

—Na'wëtj caapiya'ja' tyã' andy peecy yajcyrra caapiya'jnisame'. Andyna jycaacj tyajy we'weni'stju caapiya'ja'. ¹⁷Maava Dyus jytjääsni's cytey yuuwa'jsa üsrra', naa caapiya'jni's jiyuna Dyus we'weniteva, meerra' andy peecyrráa yajcyrra caapiya'jniteva. ¹⁸Peequírráa yajcyrra we'wesa', jytujtjesa yuuwa'jrrá'scu jytjääsu'. Nava Dyusrráana tuutje'jsa', Dyus jycaajni'rrá'scu isa we'wena pta'shi'.

¹⁹Moisesa' leya's fi'jrra ¿i'cue'shtyi üsyujmeena' vacy? Tyã'wëteva i'cue'sha' maa yujva ley jycaajni's cytey yu'tsmeei'cue. Tyãasa i'cue andya's icjya'rráa yaaqui' jite', ²⁰nasa' na'wëty pas:

—Echtjê'j yacj üsne'nga. ¿Quimga indya's icj wêje'?

²¹Tyajü' Jesusa' na'ljinac we'we:

—Qui'swal'j ente teech nasa ätsa'sa's nuycatyjiti tyãa pa'garráa i'cue tyacue susya' quiite. ²²Nava i'cue'sh yu' qui'swal'j enteva luuch pijtsty i'circuncida'i'cue, Moises jycaajni's nwëese'jrra. Naa cyaj i'cue ätsa'sa's andy nuycatyjini yu'sa' tyacue susu'. (Nava ew jiyute yu', Moises tyã'wë circuncidäywal'ja's jycaajna tacjme', jwee yatsgawe'shtyi tyã'wë jycaaj.) ²³I'cue'sha' Moises leya's cytey yuuya' süjrra i'cue qui'swal'j enteva circuncida'i' luuch pijtsty'. Sa' ¿qui'jya'cue tyacue üuscha' andy teech pitstjê'j ätsa'sa's qui'swal'j ente nuycatyjirra nviitpa'garráa? ²⁴I'cue'sha' ew jiyumey yu' fiyfiyrráa yajcyna we'wenuwe, naasáa ew jiyurra yuurráa tyã'wë diyj yu'ga süjna we'wewa'ja' jínac pta'sh.

Dyus tashu yuusa

²⁵Tyajü' Jerusalente nasa maaí yu' na'wēty puuty paapēyi':

—¿Naa pitstjē'ja'sfi icjya' pacue'tsmeetyna'? ²⁶Tyā'wē pacueetsteva, nasaa cshavyte yajcyajcymée we'wena ūsa', quim yujva ma'jīnimeete. Meerra' ¿cue'sh npiitstjē'jwe'sha' ew yuj jiyuvá'ntacy naa pitstjē'ja' Dyus tashu yuusa Cristoteva? ²⁷Naa pitstjē'ja' majuwe'shteva jīitja'w, atsa' isa Dyus caajni Cristo dyjivatsa', tyā'sa' tyāa quiwejuwe'sha' jīni yuumeena jīnaty we'we'.

²⁸Atsa' Jesusa' dyuus yatte caapiya'jna ūsfi, sus we'werra na'jīc:

—Andyas'a' jiiyujī'cue majūwe'shteva. Nava andya' peecy yuu wēerrarráa yuwe'tsmeetj, Dyus caajni ayte ūstju. Tyāa yuurráa isa we'wesa' tyāa caajsa's yu' i'cue'sha' jiyu'tsmeei'cue. ²⁹Tyā'sa' andy yuurráa jīitj, tyajy tashu caajni ayte ūstju naa pa'ga jīc.

³⁰Tyā'jīte!, tundrra preesu jyūna u'j wēety, nava quim yujva tund yu' meeta', tyā'wē yūuwa'j en ājmeyne' yu' naa pa'ga. ³¹Tyā'wēteva, wala cuj jiyuty Jesusa' quimteva sa' na'jī'ty:

—Dyus tashu yuusa Cristo quijrra', ¿naa pitstjē'tje jytjaacue quījqujva caavya'ja'jya' ājāma'c? jīnaty we'we'.

Jesusa's preesu'jya' caajni

³²Nasa tyā'wē Jesusa's tuutje'jna ūste fariseowe'sha' wēse'jrra', sacerdote npiitstjē'jwe'sh yacj puuty we'werra', dyuus yat tjengsawe'shtyi caajty Jesusa's tundrra jyūna yuucajn. ³³Atsa' preesu'jya' caajni's jiyurra', Jesusa' na'jīnac we'we':

—Andyana caajsa tashna shawendna u'jya'vatj na' i'cue'sh yacj tyachmeerráa pi'cyna ūsya'vatj. ³⁴Atsa' andya's pacuerrava uymeene'cue, tyāa pa'gatey andy u'juetstju cyte' pa'jya' ājāmeene'cue naa pa'ga.

³⁵Tyajü' judiuwe'sha' na'wēty puuty ya'paapējyaya' tacj:

—Naa pitstjē'ja' ¿mtee u'tje tyā'wē cue'sha' uymée yuucytja'w? Meerra' ¿judiuwe'sh ūsta' vite quiwesu griegowe'sh cshavysu atsa' tyāa griegowe'shtyi vāa pta'shya' u'juetsnacy? ³⁶Andyas' pacuerrava uymeene'cue, tyāa pa'gatey andy u'juetstju cyte' pa'jya' ājāmeene'cue naa pa'ga jīnac we'we' sa' ¿ma'jīrraqui'c tyā'wē we'we'? jī'ty.

Yu' ptsuwa'jmeesa

³⁷Fiesta ptsuuya' nmej en yuutste!, Jesusa' yujurra na'jīnac sus we'we':

—Maava yū'wēesa ūsrra', andy tashte myujwe tundyya'. ³⁸Andyas' ūuste jypa'gasatyī's tyāawe'sh ūuste yu' ptsuwa'jmeesa casejna nes yuuna, Dyus librute we'we'c tyā'wē.

³⁹Jesusa' tyā'jīna we'werra', tyā'sna yaacysa' Dyus Espiritu' jypa'gawa'ja'scu pta'shna tyā'jī'. Tyāa ensu' tyāa Dyus Espiritu' pa'jmeycu yu', Jesus yuu cielun tejcameycu yu' naa pa'ga.

Jesus quimteva jiyumeerra nasa fiyfiy yaacyni

⁴⁰Nasa wala kuj pjaacjena ūsnite maaii yu' Jesus pta'shni's wēse'jrra', na'wēty we'we:

—Naa pitstjē'ja' isa Dyus yuwe pta'shsa yujna jī'ty. ⁴¹Atsa' vite yu' na'jī'ty:

—Na' Dyus tashu yuusa Cristona jī'ty. Nava vite we'werra':

—Galileajū yuja', ¿Cristo' casejma'c? ⁴²Tyā'wēmeeteíic Dyus libru'te we'werra': Cristo' jycaajsa David nwe'shrra', David upyni chjamb Belentey casejena jī'c jīnaty we'we'.

⁴³Tyajū' maaii yu' Jesus ju'ngu we'wenaty neeyūu, atsa' vite yu' Jesusa's ajtsenaty neeyūu. ⁴⁴Atsa' maaii yu' preesul'jrra jyūna ul'j wēerrava, maa yujva tyā'wē yu' yūumeeta'.

Judiu npiitstjē'jwe'sha' Jesusa's jypa'gameeta'

⁴⁵Dyus yat tjengsawe'sha' qui'quin shawendna pa'tje', sacerdote npiitstjē'jwe'sh vite' fariseowe'sha' na'jīnaty pējy:

—¿Mjīitecue tyāa Jesusa's preesul'jrra jyūna yuwe'tsmée? jīte',

⁴⁶tyāawe'sh pasrra':

—Bagachte yujva naa pitstjē'j na'wē zhichcue pta'shi'c tyā'wēsa yu' iiwēse'jmeetja'w. Tyāasatja'w preesul'jmée.

⁴⁷Tyajū' fariseowe'sha' wēeshū we'werra', na'jīty:

—¿I'cue'shva vitesa na'wēy ya'ishijatsvá'cue? ⁴⁸¿Cue'sh npiitstjē'jwe'sh meerrava fariseowe'sh maarrá' tyāa pitstjē'j caapiya'jni's jypa'garra ūste i'cue'sha' jiicue'? ⁴⁹Nava tyāa pitstjē'ja's nwēese'jsa' leya's jiimeesata' na' iiméj seena' ewmeesa nwe'wewa'jmeesa yā'tja'.

⁵⁰Tyā'jīte', cytee ūssa teech fariseo Nicodemo yaasesa Jesus tashte cus pa'jya' ul'ju'ga tyāa we'werra na'jīc:

⁵¹—Yuuwesa's pa'yarra pējymey yu', castigāyya' ājame'nja'w, cue'sh leya' tyā'wē jycaaja'tsme' jīte', ⁵²tyāawe'sh pasrra':

—¿Indyva Galileajūwe'sh'vā'nga? Dyus libru's mtjeng vacy, sa' jiyune'nga: Galileajū yu', bagachte yujva Dyus yuwe pta'shsa iicasejmeeta' jīnaty atsewe'we. ⁵³Tyā'jīrra', puuty tyuteena ul'jty tyāawe'sh yatna.

Teech u'ya's Jesus peltunāyni

8 ¹Naapcachja' Jesusa' Jerusalenu casejrra Olivos vitsnac ul'. ²Sa' cuscus cusírráa dyuus yatte shawendna pa'cj. Tyajū' nasa jyucaysa utyaate', Jesusa' caapiya'jya' cachcu. ³Tyajū' ley caapiya'jsawe'sh vite' fariseowe'sha' teech u'y canzh yūuna ūste cpajcyrra Jesus tashte nuypa'jty sa' pyājte tyajrra' ⁴nal'jity:

—Caapiya'jsa, naa u'ya's canzh yūuna ūsín cpajcytja'w. ⁵Tyā'wē yūusatyi' Moises leya' cuet wāatatajrrac icjcaja'. Atsa' indya' ¿ma'wē jycaajaqui'ng? jīnaty pējy. ⁶(Cytee ājmée we'wete', paatyjī'cjya' sūjrraty tyā'wē paapēyi'.)

Nava Jesusa' quũitsjurrac quiwete cuseju fi'ja'. ⁷Atsa' manz usva jwee pējyte', Jesusa' capjuterra na'ljic:

—I'cue'sha' maarráava pcal ji'pjmeesa ūsrra', tyāa cjuē'y naa u'y cacuete cuet mwāatajwe jirra', ⁸qui' quũitsjurra quiwete fi'cj. ⁹Atsa' tyā'ljini's wēse'jrra': Cue'shva pcalsane'tca'w sūjrra, casejna u'jty teechteechrraj, nyafyte' jwee iishsa cjuē'lytyi casej. Tyā'wē jyuca casejna u'tje', tyāa u'yrrāac cytee neeyūu Jesus ūsnite. ¹⁰Atsa' Jesusa' capjuterra ley caapiya'jsawe'sh jyuca casejna u'jnite' tyāa u'yrrāa ūste uyrra', na'ljic:

—I'cuena paatyjī'cjsawe'sha' ¿mteeta yuu? ¿Maava i'cue's ewmeete nvijt-ya' ājāmeevá'nta? jite', ¹¹tyāa u'ya' na'ljīnac pas:

—Maa yujva ājāmeeta' jite', Jesusa' na'ljic:

—Andyva i'cue's ewmeete nvijtme'nja. Me'ljwe, nava peena yu' ewmēe yūuna u'junuwe jic.

Jesusa' eena'te caafi'nze'jsa

¹²Qui'quin nasa pcjaacjete', Jesusa' na'ljīnac we'we:

—Andyva' eena'te caafi'nze'jsatj, atsa' maava andy yacj yuusa' eena'te fi'nzewa'ja's ji'pjutyina, sa' bagachte yujva chji'ndyite fi'nzemeetyina.

¹³Tyājū' fariseowe'sha' na'wēty we'we:

—Indya' peequírrāa ya'tuutje'jna ūsngu atsa' tyā' cyul yujna jite',

¹⁴Jesus pasrra':

—Macue peequírrá'ntca ya'tuutje'je', nava andy pta'shni' iishiinisame'. Tyāa pa'gatey andya' jiiitj majūwe'shrra' qui' maa dyi'j ul'juetsrrava. Nava i'cue'sha' jiiimēe i'cue andy majūwe'shteve sa' maa dyi'j ul'juetsteve. ¹⁵I'cue'sha' peecy ūus yaacynijūrrāa i'cue tyā'wē we'we', andy isa we'weni's jiyumey. Nava andya' jiiimeerra yu' we'we'tsmeetj. ¹⁶Nasa ma'wēsateve isa jiyurraj we'we', Tata' andya's caacj tyāac ma'wē yūuwa'ja'sva andya's pu'chji' tyāa pa'ga. ¹⁷I'cue'sh leyte' na'ljic: Yuwe's jiisa e'nzī tyāa na'wērrarrāa we'wenisarrāa selpiina jī'c. ¹⁸Atsa' isa we'wesa teechsa' andyírráatj. Atsa' vite' andyna caajsa Tataírrá'.

¹⁹Tyā'ljite', fariseowe'sha' na'ljity:

—Iindy Tata' ¿mtee ūsna? jite', Jesus pasrra':

—I'cue'sha' andya's jiyu'tsmeei'cue, sa' andy Tatanava jiyu'tsmeei'cue. Andy quimteve jiyuvatsa', andy Tatanava jiyune'cue jīnac pta'sh.

²⁰Dyuus yatte ofrenda āshni caja pucate caapiya'jna ūsrra', tyā'ljīnac pta'sh Jesusa'. Nava maa yujva preesu'jya' ājāmeeta', preesu'jwa'j en ājmeyne' yu' naa pa'ga.

Andy ūsnite' pa'jya' ājameene'cue

²¹Jesusa' qui'quin we'werra na'ljic:

—Andya' ul'juetstju, atsa' i'cue'sha' macue pacueene'cue, nava andya's uymey i'cue'sh pcalte uune'cue. Tyāasa andy u'juetstju cyteea' pa'jya' ājameene'cue jīna we'wete!', ²²judiuwe'sha' na'l'jity:

—Meerra' ζpeecy cusetey uuya'vaváanacy, tyāasa vá' andy u'juetstju cyteea' pa'jya' ājameene'cue jīna we'we'cy? jīte!', ²³Jesusa' pta'shcu:

—I'cue'sha' aytewe'shi'cue, naapcachja' andya' ēejūwe'shtju. Atsa' i'cue'sha' naa quiwetewe'shi'cue, naapcachja' andya' naa quiwetewe'shmeetj. ²⁴Tyā'wērra'itj i'cue'sh pcalte uune'cue jīna pta'shi'. Tyā'wē Dyus caajnisá' andyrráatj jīna pta'shteva jiyumée yā'jrra', i'cue'sh pcalte uune'cue jīna pta'shte!', ²⁵na'jīnaty paapējy:

—Tyā'wērra' ζindya' quimnga? jīte!', Jesus pasrra' na'jic:

—Andya' quimrrava nyafii pta'shyā'tj. ²⁶Tyāasa wala pta'shwa'l jiptju i'cue'sh ma'wēsateva āate pta'shna, tyāa pa'gatey andyna caajsa' īshiisame!, atsa' andya' tyajy we'weni's wēse'jrra tyā'wē fīrráatj pta'shi' maava jiyucajn jīnac we'we.

²⁷Tyā'wē Dyusa' andy Tata' jīna Jesus pta'shteva jiyumeeta!. ²⁸Tyāa pa'gac Jesusa' na'jīna we'we:

—I'cue'sha' Dyus Nchi'c Nasa Yuusa's ēete tyajrra yuurráa jiyune'cue quimteva, sa' peecyrráa yu' we'wemée, wejyva Tata cwe'we'jnirrá'sne' caapiya'l sūjune'cue. ²⁹Tyāa pa'gatey andyna caajsa', andy yacj ij ūsa', Tata' andyrráa yu'sa' nviitu'tsme!, tyajy jytjāasnirrá'stju cytey yu' naa pa'ga jic.

³⁰Tyā'jīna we'wete!', nasa cujsa Jesus ju'ngu yuuty.

Ewmeete fi'nzesa vite' ewmeejū nwe'wenisa

³¹Tyajū' Jesusa' tyajy ju'ngu yuusaawe'shtyi' na'jīnac pta'sh:

—Andy caapiya'jni's jypumbamée nwēese'jrra!, andy nasa yuurra ³²ewsa's jiyune'cue, atsa' tyāa ewsa' ewmeesajū nwe'wena jīte!', ³³tyāawe'sha' na'wēty pas:

—Cue'sha' Abraham jiltja'w, sa' bagachte yujva ewmeete yu' fi'nzesameetja'w. Atsa' indya' ζma'wēnga ewmeesajū nwe'weni yuune'cue jīna we'we'? jīte!', ³⁴Jesusa' pta'shcu:

—Isatj we'we!, maava ewmée yūuna fi'nzesa!, ewmeete fi'nzesata!. ³⁵I'cue'sha' peecy jii i'cue: selpisa' yat namu na'wēsame!, naasáa peecy nchi'c yuurráa yat namu na'wēsa!. ³⁶Tyāa pa'ga yat namu na'wēsa Dyus Nchi'c tyā'wē ewmeesajū nwe'wete yuurráa, isa ewmeete fi'nzesamée yuj yuune'cue. ³⁷I'cue'sha' Abraham jiltjeva jiiitj, nava andya's icj wēje'l'cue, andy caapiya'jni's nwēese'lj wēemeerraráa. ³⁸Andy Tata cwe'we'jnirrá'stju pta'shi!, naapcachja' i'cue'sha' i'cue'sh tata jycaajni'rá's i'cue cytey yu' jīte!', ³⁹tyāawe'sha' na'wēty pas:

—Cue'sh tata' Abrahana! jīte!', Jesus pasrra!:

—Abraham luuchvatsa!, Abraham na'wēy yūune'cue. ⁴⁰Tyā'wēteva, andyna ma'wē Dyus caapiya'tje!, tyā'srráatj isa pta'shi!. Nava i'cue'sha' andya's icjya' yuurráa i'cue pa'pchu!. Abrahana! bagachte yujva tyā'wē yūume!. ⁴¹I'cue'sh tata ma'wē yūute!, i'cue'shva tyā'wēy i'cue yū' jīte!', na'wēty pas:

—Tyãljïcajna!, cue'sha' çptamunimeesa luuch vá'ntca'w? Cue'sha' teech tatarráa ji'ptja'w, tyã' Dyusa' jíte', ⁴²Jesusa' na'jínac we'we:

—Isa Dyusa' i'cue'sh tatavatsa!, andya's ajtseemeene'cue, andya' Dyus tashu caajnitj yuwé! tyãasa ayte ústju. Andya' peecyrráa yu' yuwe'tsmeetj, andya'sa' Dyuscu caaj. ⁴³Na'sva andy caapiya'jni's jiyu'tsmeei'cue, tyã'wé andy we'weni's nwëese'je'tsmeei'cue, tyãasa i'cue jiyu'tsmée. ⁴⁴I'cue'sh tata!, echtjê'ja!, atsa' i'cue'sha' tyajy luuchi'cue. Tyã'wërraí i'cue tyajy jytjãasni's cytey yuu wêje!, echtjê'ja' nyafiitey nasaa quicje'jsa' naa pa'ga. Echtjê'ja' bagachte yujva ewsa's yú'tsme!, sa' bagachte yujva isa we'we'tsme!. Tyãa yuu tyã'wëesana na' íshinarráac we'we!, sa' caaíshijja'jsa!. ⁴⁵Nava andy isa we'weni yu's nwëese'je'tsmeei'cue. ⁴⁶I'cue'sha' çmaarra' andya's pcalsa' jína ucje'jya' äjama'cue? andya' isasarrá'stju pta'shi' atsa!. Andy isasa's caapiya'jatste!, çma'wëtecue andy we'weni's nwëese'je'tsmée? ⁴⁷Dyus luucha' Dyus we'weni's nwëese'je'ty. Nava i'cue'sha' nwëese'je'tsmeei'cue na' Dyus luuch meei'cue jïc.

Abrahan meetey Cristo úsyã'tj yu'

⁴⁸Tyajü' judiuwe'sha' Jesusa's na'wëty atsewe'we:

—Indya' Samariajüwe'shngu, tyãasa echtjê'j yacj úsngu atsa' isatja'w tyã'j'i' jíte', ⁴⁹Jesusa' na'wëc pas:

—Andya' echtjê'j yacj úsmeetj, naasáa andy Tata's tuutje'jsarráatj. Nava i'cue'sha' andya's atse'i'cue. ⁵⁰Andya's wechana tuutje'jni's pacue'tsmeetj. Nava teech úsa' andya's tuutje'jsa tyã' andy ma'wësatéva jiia!. ⁵¹Isatj we'we!: Andy we'weni's cytey yuusa!, bagachte yujva uu ena's ji'pjumeetya.

⁵²Tyã'jíte!, judiuwe'sha' na'wëty we'we:

—Ächtja'w wejy ew jiyu, echtjê'j yacj ústeva. Abrahana' uuc sa' Dyus yuwe pta'shsawe'shva uuty. Naapcachja' indya' na'j'i'ng: Maava andy we'weni's cytey yuurra!, bagachte yujva uu ena's ji'pjumeetya j'i'ng. ⁵³Cue'sh yatsgawe'sh Abrahana' uuc sa' Dyus yuwe pta'shsawe'shva uuty, atsa' indya' çAbrahante jytjaacuesa vá'nga? jíte!, ⁵⁴Jesusa' na'wëc pas:

—Andyírráa ya'tuutje'jna pta'shi'nja na' tyã' selpimeena. Nava andya's tuutje'jsa' andy Tata' tyã's i'cue cue'sh Dyusa' jína we'we!. ⁵⁵Nava i'cue'sha' tyãa Dyusa's jii yuuva meei'cue. Nava andya' tyã'sa' ew jii'tj. Tyã'wé tyã'sa' ew jii'ra jii'mee'tj j'i'nja na', i'cue'sh na'wëy íshijja yu'nja. Nava andya' íshimée Dyusa's jii'tj, sa' tyajy jycaajni's cyteytju yu!. ⁵⁶I'cue'sh yatsgawe'sh Abrahana' andy naa quiwete pa'ljwa'ja's jiyurra!, wala wechana yajcyu, sa' cytey yuuni's jiyurra' wejycu wala wecha.

⁵⁷Tyã'jíte!, judiuwe'sha' na'wëty weech we'we:

—Indya' cincuenta añu yujva méé ji'pjingu, sa' çma'wënga tyã'wë Abrahana's uy? jíte!, ⁵⁸Jesus pasrra!:

—Isatj we'we!, Abrahan meeiín, andya' úsyã'tj yu'.

⁵⁹Tyã'jíte!, judiuwe'sha' úsacharra!, Jesusa's cuet wáatatajya'vaty yu!. Nava Jesusa' tyãawe'sh cshavysuy dyuus yatu casejna u'cj, quim yujva jiyunimeete.

Teech pitstjê'j uyya' ājasame's Jesus yu'tse'jni

9 ¹Jesusa' u'juetsrra', teech pitstjê'j naa quiwete upyí uyya' ājasame'scu puuty uy. ²Atsa' tyāa yacj u'jusawe'sha' Jesusa's na'wēty paapējy:

—Naa pitstjê'ja' ¿quíj yuupa'gaqui'c tyā'wē yafy jí'pjmée upyna úsu? ¿Tyajy pcalpa'ga ma'c tyā'wē ñus jí'pju, meerra' neywe'sh pcalpa'ga vá' tyā'wē yuu? jíte', ³Jesus pasrra' na'jic:

—Tyajy pcalpa'gava me', sa' neywe'sh pcalpa'gava meec tyā'wē yuu, naasáa Dyus ewuni's āate caavya'ja'cjanrráac tyā'wē yuu. ⁴Tyāa pa'ga caajsa mjíia's āate caavya'ja'jna mjíiwa'j jí'ptju nee en úsiyna. Tyā'wēme' cus yā'tje', quim yujva mjíiya' ājameena. ⁵Andya' naa quiwete nee úsírráava, nasaty eena'te caafi'nze'jwa'jsatj.

⁶Tyā'jírra', quiwe's fyne'shju tuupja'rra tyāa pitstjê'j yafyte shúshna'va, ⁷na'jínac jycaaj:

—Me'j pcj'i'cyya' Siloé yu'cafyte. (Tyāa Siloea' Jycaajnisá jīni'.)

Tyajū' tyāa pitstjê'ja' u'jrra', yafytyi pcj'i'cyacu, sa' uyna yā'cj shawendna cūj. ⁸Atsa' tyajy yat utyasuwe'sh vite' nyaffí tyā'wē yafy jí'pjmée upysateva ew jíisa' na'wēty we'we:

—Naa pitstjê'jí ¿nyafí' Imushnu pējyyna u'psa meená'? jíte', ⁹maafí yu':

—Tyāaíic jí'ty. Naapcachja' vite':

—Tyāa na'wē yuj tjengu'c, nava tyāame' jí'ty. Nava tyāa pitstjê'j yu':

—Andyíitj jíc.

¹⁰Tyajū' pējytyi:

—Indy upynijūjy uyya' ājameerra', āchja' ¿ma'wē yuurranga uyya' āja'? jíte', ¹¹pta'shcu:

—Teech pitstjê'j Jesus yaasesa' quiwe's fyne'shju tuupja'rra andy yafyte shúshna'va na'jic: Me'j pcj'i'cyya' Siloé yu'cafyte jíte', u'jna'va pcj'i'cytju, atsa' andy yafya' pjatety atsa' uyu'tj jíte', ¹²paapējytyi:

—Indya's tyā'wē caajsa' ¿mtee úsna? jíte':

—Jiimeetj jínac pas.

Fariseowe'sh tyāa pitstjê'ja's paapēyni

¹³Tyajū' tyāa pitstjê'ja's pe'jna u'jty fariseowe'sh tashna. ¹⁴Jesus tyā'wē quiwe's fyne'shju tuupja'rra uyya' ājasame's yu'tse'jni' qui'swa'j enne' yu'. ¹⁵Atsa' fariseowe'sha' qui' paapējytyi tyāa pitstjê'ja's:

—¿Ma'wē yúurranga āchja' uyya' āja'? jíte', na'jínac pta'sh:

—Quiwe's fyne'shju tuupja'rra andy yafyte shúshcu, atsa' pcj'i'cytju sa' uyya' ājatj jíc.

¹⁶Tyajū' fariseowe'sh maafí yu' na'wēty we'we:

—Tyā'wē yúusa' Dyus luuch meena, qui'swa'j ena's qui'su'tsme' na' jíte', vite' na'wēty we'we:



(San Juan 9.6)

—Pcalsarra', ¿ma'wē tyā'wē quim yujva ājānimeesa's caavya'ja'jya' ājācy? Tyajū' tyāawe'shírráa tyā'wē we'werra', puuty puiindy'ty neeyūu.

¹⁷Sa' tyāa pitstjē'ja's qui' paapējytyi:

—Iindy yafya's yu'tse'jsa' ¿quimna sūju'nga? jīte':

—Tyā' Dyus yuwe pta'shsana sūju'tj jīnac pas.

¹⁸Tyā'wē upynijūjy uyya' ājasameerrava āchja' uyu'tj jīteva, judiuwe'sh yu' tyā'wēne' yu' sūju'tsmeeta'. Sa' tyāa pitstjē'l' neywe'shtyi pa'yarra', ¹⁹paapējytyi:

—¿Naa tyā'wē i'cue'sh luuch upynijūjy uyya' ājasameena vacy? Sa' ¿ma'wē yūurraga āchja' uyya' āja'? jīte', ²⁰neywe'sh pasrra':

—Na' cue'sh luuch yuja', tyā'wē upyjūi uyya' ājasameeteva tyā'sa' jīitja'w. ²¹Nava jīimeetja'w ma'wē yūurrane' āchja' uyya' āja'. Sa' quim tyā'wē yafytyi' yu'tse'tjeva tyā'snava jīimeetja'w. Tyā's yuu mpējywe, tyā' tjē'jsayā'ja' na' tyāa pta'shina.

²²Paapēysatyi' ūucjrraty tyā'wērráa pas. Tyā'wēme' maa tyā'wē Jesusa' Dyus caajni Cristo' jīna tuutje'jena tyā'sa' fariseowe'sha' ajtserra peena yu' tyāawe'sh pcjaacjenite caapa'ja'jya'méety ūsu'. ²³Atsa' tyā'wē yuuya'vatety ūucjrra: Na' tjē'jsayā'ja' na' tyāa pta'shina jīnarráa pasu'.

²⁴Tyajū' fariseowe'sha' tyāa pitstjē'ja's qui' pa'yarra' na'wēty we'we:

—Dyus dyi'pte išhiimée mpeeta'sh. Cue'sha' jīitja'w iindy yafytyi yu'tse'jsa' pcalsateva jīte', ²⁵tyāa pitstjē'l' pasrra' na'jīc:

—Pcalsa váana nava andya' jiimeetj. Andya' na'wërráa jii'tj: nyaffi' uyya' ája'tsmeetj, nava áchja' uyu'tj jíte', ²⁶ qui' paapëjytyi:

—¿Quíjga yúu? sa' ¿ma'wërraj yúurraga iindy yafytyi' yu'tse'lj? jíte', ²⁷ tyā' na'wëc pas:

—Pta'shyā'tj, nava pta'shteve atsewe'we'rráa i'cue. Sa' ¿quíjya'cue peena pta'shcaja'? ¿I'cue'shva tyāa yacj u'ju wëje'vá'cue? jíte', ²⁸ na'jínaty wëeshúu:

—Indya' tyāa yacj u'jusang. Nava cue'sha' Moises jycaajni's nwëese'jsatja'w. ²⁹ Cue'sha' jii'tja'w Dyusa' Moises yacj puuty we'wec. Nava tyāa tjē'ja's majūwe'shteve jiimeetja'w.

³⁰ Tyajū' tyāa pitstjē'ja' na'wëc we'we:

—Wala yuj fiya', andy yafytyi yu'tse'jsa's majūwe'shteve i'cue'sha' jiyumeete'. ³¹ Maava jii'tja'w Dyusa' pcalsawe'sh we'weni's pasu'tsme', naasáa Dyusna yajcyrra tyajy jycaajni's cytey yuusarráatycu Dyusa' pasu'. ³² Bagachte yujva iiwëse'jmeetja'w upyjíi uyya' ájasameety qui' caauyu'jni yu'sa'. ³³ Andy yafytyi yu'tse'jsa' Dyus caajnisameevatsa', tyā'wë caauyu'jya' ájawa'lmeene' yu' jíte', ³⁴ na'wëty wëeshúu we'we:

—Indya' upyjí iindy ūuste pcalrrarráa uta ji'pj upysang na' ¿ma'wëtenga cue'shtyi yu'cypej wëje'? jína atsewe'werra', neeuty peena yu' jypa'gaya'mée.

Uysarrava Dyus yu's jiimeesa

³⁵ Tyajū' Jesusa' tyāa pitstjē'ja's neeuni's jiyurra', qui' puuty uyrra' na'wëc pëjy:

—¿Dyus Nchi'c quimteva jii'ngá'? jíte', ³⁶ tyāa pitstjē'lj pasrra':

—Mpeeta'sh andy jiyucajn jína pëjyte', ³⁷ Jesusa' pta'shcu:

—Indya' Dyus Nchi'ca's iuuyyā'jng. Andyíitj, atsa' indya' tyāa yacjngu puuty we'we'.

³⁸ Tyā'jíte', tyāa pitstjē'ja' Jesus tashte peejyūcuerra':

—Indya' Dyus Nchi'c yuj yu'nga sūju'tj jíte', ³⁹ Jesusa' na'jínac pta'sh:

—Andya' na'wë yuuya'írrráatj naa quiwete quij, uyya' ájasameerrava uyya' ájácajn, atsa' macue uysarrava uyya' ájácajmén.

⁴⁰ Tyajū' fariseowe'sh cytee ūssa' tyā'wë wëse'jrra', na'wëty pëjy:

—Cue'shva uyya' ájasameevá'ntca'w jíte', ⁴¹ Jesusa' na'jínac pta'sh:

—I'cue'sha' uyya' ájásamée dyijvatsa', yuuwesamée yuune'cue. Nava uyu'tja'w jī'i'cue na', tyāa pa'ga Dyus dyi'pte' yuuwesai'cue jīc.

Piisháa cyuupjni's caaja'nda'jna pta'shni

10 ¹ Isatj we'we', maava piisháa ca'ga'jni vitytey u'camée, vite ajte vitytemée u'casa' tyā' pesweeta'. ² Nava vityte u'casa' piisháa-tjengsarra tyā'wë yuuna. ³ Atsa' cyte vityte tjengsa' vitya's pjaande'c u'cacajn. Atsa' piishá' jiyu'ty jype'jsa we'weni's, tyajū' teechtechrraj

cysusna pa'yarra cyuupjniñũ cutyi'ji'c. ⁴Sa' jyuca cashishrra', piisháa-tjengsa' yatstec u'jue', atsa' piisha' tyajy e'ste wa'lmeety u'jue', jype'jsa pa'yani's jiyu'ne'ta naa pa'ga. ⁵Nava nasa fiysa pa'yate yu', u'jmée wejyva ũpjna u'jue'ty, nasa fiysa pa'yate jiyurraty tyā'wē ũpju'.

⁶Jesusa' naa ejemplo's pta'shnac caapiya'j, nava nasa' jiyumeeta' tyā'wē pta'shni's.

Jesusa' ew jype'jsa'

⁷Nasa jiyumeete', Jesusa' na'jīnac qui'quin pta'sh:

—Isatj we'we': Andyí piisháa u'cani vity na'wēsaj. ⁸Andy pa'jmeyna yatste pa'jsa' jyucay išhiisa pesweerráaty yu'. Atsa' piishá' ũucjrra utyaameeta'. ⁹Andyí vity na'wēsaj, atsa' maava andy tashte u'casa', nwe'weni yuutyna. Tyajüyá'ja' qui' casejn qui' u'can tyā'wē yuuna ũsrrava, sā'jīni nes yuutyna.

¹⁰Ewmeesa' pesweena icjna jyuca pembaya'rráaty pa'ja', naapcachja' andya' bagachte yujva ptsumée ũtyi fi'nzeczajntju yuwé'. ¹¹Andya' piishaaty ew jype'jsaj. Atsa' ew jype'jsa' piishaaty peeygājrra nwe'wepa'garráa tyajy ũtyi fi'nzeni's iviituya' ũsa'. ¹²Nava vyuu pa'garráa piishaaty tjengna ũssa' yu'cj ech yujte uyna'va, piishaaty tjengmée ũpjna u'jue'ty, piisháa-tjengsa meena sa' piisha' tyāa jīiva meetyna, tyāa pa'gaty tyā'wē yū'. Atsa' tyā'wē yūute', yu'cj echa' piishaaty manzva icje'c, naapcachja' ũtyisa yu' ma'wēva ũpju'ty. ¹³Tyā'wē vyuu pa'garráa tjengna ũsna, tyāasane' ũpjna u'jue' piishaaty'j tjengmée.

¹⁴⁻¹⁵Andya' piishaaty ew jype'jsaj. Andy Tatava ma'wē andya's ew jiina atsa' andyva ew jiiit Tata's, tyā'wēy andyva piishaaty'j ew jiiit, atsa' andy piishaava andya's jiita'. Andy piishaaty wendyrra nwe'weya' andy ũtyi fi'nzeni's iviituya'vatj. ¹⁶Tyā'wēy piisháa vite ji'ptju ayte cyuupjnimeesa tyāatyva nuypa'ja'nja. Atsa' tyāawe'shva andy pa'yani's nwēese'jetyna. Tyā'wē yūute', teech ajterrarráa jyuca pcjacjni neeyūutyna teech jype'jsa yacjrráa.

¹⁷Tyā'wē andy ũtyi fi'nzeni's ya'iviituya'vatj, nava ũtyi yuuwa'ja's qui' jypa'gaya'vatj, tyāa pa'gac Tata' andya's wendy'. ¹⁸Andy ũtyi fi'nzeni's quim yujva cusa'jya' ājameena. Andy yuutj peequí ya'ducje'. Sa' andy ũtyi fi'nzeni's ya'ducjrra uuya'va āja'nja sa' qui' ũtyi yuuwa'ja'sva qui' jypa'gaya' āja'nja. Tyā'wē yūucajncu andy Tata' andya's caaj.

¹⁹Tyā'wē we'weni's judiuwe'sh wēse'jrra, cuj jwendtyi yajcyna neeyūu. ²⁰Maai yu' na'wēty ũuschawe'we':

—¿Qui'jya'cue nwēese'je' echtjē'j yacj ũsrra luucu we'weni's? jī'ty.

²¹Naapcachja' vite' na'jī'ty:

—Echtjē'j yacj ũsrra', quim yujva na'wē zhichcue caapiya'jya' ājameena. Echtjē'jrra', tyā'wē uyya' ājasameety caauyu'jya' ¿ājāma'c?

Judiuwe'sh Jesusa's atseni

²²Dyuus yata's tyajna jyā'jni's añu iisaty fiesta'ja' Jerusalen chjambte. Sa' tyāa fiestatety ūsu' nus ente. ²³Naapcachja' Jesusa' dyuus yat pwa' Salomon jii jīnisuc pecūjna u'ju'. ²⁴Atsa' judiuwe'sha' tyajy tashte pcjaacjerra na'wēty pējy:

—¿Bagachpcach cue'shtyi caypumba'jna ūsya'vanga? Indya' Dyus tashu yuusa Cristorra', teejwend mpeeta'sh jīte', ²⁵Jesusa' na'jīnac pas:

—Pta'shyā'tj, nava andy we'weni's jypa'ga'tsmeei'cue. Andy Tata jycaatje', na'wē quijva mjī'tj, atsa' andy mjīini' āate caajiyu'ju'ty andy quimteva. ²⁶Andy piishāa mee'cue jī'tj na', isa i'cue'sha' tyā'wēsa yuji'cue. Tyāasa i'cue andya's jypa'gaya' wa'lu'. ²⁷Andy piishaaty jīitj, atsa' tyāawe'sha' andy pa'yani'sva wa'lmée nwēese'je'ty, sa' andy yacj u'jue'ty. ²⁸Tyāasatj tyāawe'shtyi' psumée ityi fi'nzewal'ja's peesu'. Atsa' quim yujva andy cusejū' cusa'jmeena, sa' bagachte yujva vitumeetya. ²⁹Andy Tata maateva jytjaacuesac andy cusetē ducj, atsa' quim yujva cusa'jya' ājameena andy Tata cusejū'. ³⁰Tata andy yacja' tyāa na'wērrarráatja'w.

³¹Tyā'jīte', judiuwe'sha' Jesusa's qui' cuet wāatatajya'vaty yu'. ³²Atsa' Jesusa' we'wec:

—Andy Tata pu'chte i'cue'sh dyi'pte mjīi ewsarrarrāa wala cuj caavya'ja'tj. Atsa' andy mjīi ewsa ¿maaga i'cue'shtyi ewmeena' tjengu' atscue andya's cuet wāatataj wēje'? jīte', ³³judiuwe'sh pasrra' na'jīty:

—Ew yūupa'ga tyā'wē cuet wāatatajya'vameetja'w. Nasarrāang, naa cyajng Dyustju jīna Dyusa's weech we'we', tyāa pa'ga tyā'wē yūuya'vatja'w.

³⁴Tyajū' Jesusa' na'wēc we'we:

—I'cue'sh leyte i'cue'shtyi we'werra': Dyus i'cue ¿jī'tsmeena'?

³⁵Jiitja'w Dyus librute fi'jni's maava weech we'wewa'jme'. Maava Dyus yuwe's jypa'gasayā'ja', Dyus i'cue jīnac we'we Dyusa'. ³⁶Nava andya' tyā'wēsarrāameetj. Andya' Dyus yuu tyjityjrra naa quiwete caajnisatj, atsa' andya's ¿ma'wē Dyusa's weech we'we'c Dyus Nchi'ctju jīna jīya' ājaqui'cue? ³⁷Meerra' andy Tata mjīi caajnimeesarrāaty vāa mjīina ūsne'tca atsa' andy we'wenityi' jypa'ganuwe. ³⁸Nava andy Tata mjīi caajnisaty yuj mjīite', andy yu's jypa'gameerrava, andy we'wenirráatyva miipa'gawe. Tyā'wē yūurrarrāa jiyune'cue, andy Tata' andy yacj ūsa', atsa' andya' Tata yacj ūsteva.

³⁹Tyā'jīte', Jesusa's preesu'jrra jyūna ul'j wēety. Nava preesu'jmeyna, casejna u'cj.

⁴⁰Tyajū' Jesusa' Jordan yu'wala cuten u'jrra', Juan nyafii bautisāyna ūsu'c cyteec ūsu'. ⁴¹Atsa' nasa wala cuj tjengya' pa'jrra', na'wēty we'we:

—Juana' quim yujva ājanimeesaty caavya'ja'jmeerrava, pta'shcu naa pitstjē'j pa'jrra ma'wē yūuwa'ja'sva, atsa' tyā' i'shiinimée jyuca cytey yuuc jī'ty.

⁴²Tyajū' cytee ūssa nasa' wala cujsa Jesus quimteva jiyuty.

Lasaro uuníi

11 ¹Betania chjambte teeoh pitstjē'j Lasaro yaasesac ātsā'na ūs yu', npe'shwe'sh Maria Marta u'pni chjambte. ²Tyāa ātsā'sa npe'sh Mariac tyā'wē Jesus chindacjē wēt putasa's awrra tyajy dycjasju andyi'jwa'jsa yu'. ³Tyāawe'sha' pyacjity ndiyi ātsā'na ūste', Jesusa's pta'shcajn yuwe caaj:

—Indy namicu wendynisa' wala ātsā'na ūsa' jīna.

⁴Tyajū' Jesusa' naa pta'shni's wēse'jrra' na'jīc:

—Na'wē ātsā'na ūsrrava, uuwa'jsa meea'. Naasāa Dyus ājāni's āate caavya'ja'jna, tyā'wēy Dyus Nchi'c ājani'sva caavya'ja'cjanrrāa tyā'wē ātsā'na ūsa'.

⁵Atsa' Marta Maria tyāawe'sh ndiyi Lasaro yacja' Jesus wendynisaty yu'. ⁶Nava Lasaro' wala ātsā'na ūsa' jīna pta'shni's wēse'jrrava, nee e'nz enfīc tyajy u'junisu jytjēyūu. ⁷Tyāa e'nz en scjēwniijū', Jesusa' na'jīnac we'we tyāa yacj u'jusawe'shtyi:

—Judea quiwen qui' u'juega jīte', ⁸tyāawe'sha' na'wēty pas:

—Caapiya'jsa, mwēese'j. Tyāwāsu' judiuwe'sha' indya's icj wēerra cuet wāatatajya'vaty yu', atsa' ŷma'wēnga cytey qui' u'j wēje'? jīte', ⁹Jesusa' na'wēc pas:

—Isa ena' doce ora ŷjī'pjmeena'? Maava en u'jurra' yu'spē'tjemée fi'nzetyna, eena' cweetjniitene'ta fi'nze' naa pa'ga. ¹⁰Nava cus u'jurra', yu'spē'tjetyna, eena' cweetjnite u'jupa'gamée.

¹¹Tyajū' na'jīc Jesusa':

—Cue'sh namicu Lasaro' deeni', nava andya' fityya' u'jue'nja jīte',

¹²tyāa yacj u'jusawe'sha' na'jīty:

—Deenirráa ūsrra yu', fityte' quiiteena jīty.

¹³Lasaro' uuni ūstec Jesusa' tyā'wē we'we. Nava tyāa yacj u'jusawe'sha' jiyumeerra', i'née deenisarrá'sne' we'we' sūju'ne'ta.

¹⁴Tyajū' Jesusa' teejwendcu āate pta'sh:

—Lasaro' uuni' jīna. ¹⁵I'cue'sha' andy ājani's uyrra' andy quimteva jiyucajn, ewrrá'ntca cytee ūsu'tsmée. Tyā'wē uuniyā'j ūsteva, tjengya' u'juega jīte', ¹⁶Tomas mellisu jī'ty tyā' na'wēc we'we vite pi'cyna u'jusawe'shtyi:

—Cue'shva u'juega Jesus yacj ja'nda uuya' jīc.

Jesus ityi vit-sa

¹⁷Jesus cytee pa'jatste', Lasaro's pendaní pajnz enyā'cj yu'. ¹⁸Atsa' Betania chjamba' Jerusalen chjambuj e'nz kilometro y mediorráac jyu'cja ūsu'. ¹⁹Atsa' judiuwe'sha' wala cuj pa'cju'ta tyā'wē ndiyi uute', npe'shwe'shtyi cviisha'jya'. ²⁰Atsa' tyāa entey Jesusa' pa'jatsa' jīni's jiyurra', Marta' puuty uuya' casejc. Nava Maria' yatte neeyūuc.

²¹Tyajū' Marta' Jesus yacj puuty uyrra' na'jīnac we'we:

—Indy ayte ūssavatsa', uuwa'jmeene' yu' ū'cue ndyi'sha'. ²²Nava jīitj Dyusa' jyuca ūsuna indy quīj pējyteva jīte', ²³Jesusa' na'wēc pas:

—I'cue ndyiya' ityi yuuna jīte', ²⁴Marta' na'wēc pas:

—Ũ'cue' jiiitj, uusaawe'sh ñtyi yuu ente' ñtyi yuuyujuna.

²⁵Nava Jesusa' na'ljïc:

—Andyí uuniiteva ñtyi vit-satj, sa' ptsumée ñtyi fi'nzewa'ja'sva andyí peessatj. Maava andya's ùuste jypa'gasa' macue uurrava qui' ñtyi yuutyina. ²⁶Atsa' maava nee ñtyi ùssa' andyna ùuste jypa'garra', bagachte yujva uuwa'jmée ñtyi fi'nzetyina. Andy we'weni' isa yujtyna ¿süju'cue'? jíte', ²⁷Marta pasrra':

—Tyã'wē yujna süju'tj. Indya' Cristong, Dyus Nchi'c naa quiwete quiisa jïc.

Jesus ũ'neni

²⁸Tyã'wē we'wena jyã'jrra', Marta' yatna shawendna u'cj nyacja's pa'yaya'. Sa' na'ljïnac susmée we'we:

—Caapiya'jsa ayte yã'j ũsa', sa' i'cue's yuu caacj.

²⁹Tyã'jï'tspcachja', Maria' quiitena' wala dund u'cj Jesusa's puuty uyya'.

³⁰Jesusa' Betania chjambte u'cameycu yu', Marta yacj mteene' puuty uy cytee nee ũsiyrráac yu'. ³¹Atsa' Maria' quiiterra wala dund scjēwte', judiuwe'sh tyãa yatte cviisha'jna ũssa' e'stey u'jty, pendaní cafyte váa ũ'neya' u'juetsna süjrra.

³²Tyajú' Maria' Jesus tashte cüjna'va, peejyücuerra na'wēc we'we:

—Cue'shtyi jype'jsa, indy ayte ũsavatsa', ũ'cue ndy'i'sha' uuwa'jmeene' yu' jïnac we'we.

³³Tyã'wē Maria vite' judiuwe'sh pi'cyna yuusa ũ'netste Jesusa' uyrra', tyãava wala ñusrra' ³⁴pějycu:

—¿Mteecue pendáa? jíte':

—Myuj vacy tjengya' jïty.

³⁵Atsa' Jesusa' ũ'nec. ³⁶Tyã'wē Jesus ũ'netste uyrra', judiuwe'sha' na'ljïty:

—Mtjengwe ma'wēga wala peeygãja'.

³⁷Nava maái yu' na'wēty we'we:

—Naa pitstjē'ja' uyya' ñjasameetyva caauyu'ju'c na' ¿qui'jrráava yũuya' ñjawa'jmée ma'c yu' Lasaro uucajmén?

Lasaro's ñtyi vitni

³⁸Tyajú' Jesusa' qui'quin wala ñusna utyaac Lasaro's pendaní cafyte. Tyãa cafya' dyyiga pwa'ja'nic yu', atsa' u'cani vityte yu' cuetcu apjni yu'.

³⁹Jesusa' na'wēc jycaaj:

—Apjni cueta's mquiuswe jíte', uusáa npe'sh Marta' na'ljïc:

—Uuníi pajnz enyã'ja', atsa' pjandete' ¿canzh putameema'c? jíte',

⁴⁰Jesus we'werra':

—Andy pta'shñityi' tyã'wē yujna süjna ùuste jypa'garra', Dyus ma'wēsateva jiyune'cue ¿jïtsmeetca'?

⁴¹Tyã'jíte', tyãa apjni cueta's quiistyi. Atsa' Jesusa' cielute pagayrra na'wēc we'we:

—Tata, andy pēyni's pasu'ng naa pa'ga wecha'tj. ⁴² Andya' jii'tj, indya' bagachteva andya's pasu'ng. Nava tyā'jīna ātetj wechá', ayte nasa ūsta' tyāawe'sh wēse'jrra', andya'sa' Dyus caajni yuj yu'ne' sūjcajn.

⁴³ Tyā'jīrra', Jesusa' suscu we'we:

—Lasaro, tyāajū mcaasej jī'tspcachja', ⁴⁴ uusá' ityi yuurra casejc, chinda, cuse pety dyi'p yā'jrra yapni. Atsa' Jesusa' cjimbcacj u'jya' ājācajn.



(San Juan 11.44)

Jesusa's icjya' puuty we'weni
(Mt. 26.1-5; Mr. 14.1-2; Lc. 22.1-2)

⁴⁵Uusá's ityi vitni's uyrra', Maria's pi'cyna ússa judiuwe'sha' Jesusa's úuste jypa'garraty neeyúu. ⁴⁶Nava vite judiuwe'sh atsesa yu' fariseowe'sh tashna u'jrra', Jesus tyá'wē uusá's ityí vitni's pta'shtyi. ⁴⁷Atsa' fariseowe'sha' sacerdote npiitstjē'jwe'sh yacj pcjaacjerra', na'jīnaty puuty we'we:

—Naa pitstjē'ja' naa quiwete quim yujva ajanimeesaty caavya'ja'jna quijquijva yūuna úsa'. Atsa' ¿quij yuucytja'w? ⁴⁸Tyāa pitstjē'ja's quijrráava yūumeete', nasa' jyucay tyāa yacjrrarráa u'juetya. Atsa' Romajū nasa cue'sh dyuus yata's iviiturra', cue'shtyiva iviitutyana.

⁴⁹Tyajū' tyāa añute sacerdote npiitstjē'j Caifasa' na'wēc we'we:

—I'cue'sha' úus yajcyya'rráa yujva ājā'tsmeei'cue. ⁵⁰Cue'sh ji'j jyuca yu' vitucajmen wejyva jyucasa pa'gate teech yuurráa vituvatsrráa wejy ewna. Tyá'wē yūuwa'ja's úus yajcyya' i'cue āja'tsmée.

⁵¹Caifasa' tyāa añute' sacerdote npiitstjē'cj yu', sa' peecyrráa tyá'wē yajcyrra we'wemeene'. Jesusa' judiuwe'sh jyucaysa pa'gate tyāarráa uuwa'tjene' Dyusa' Caifasa's tyá'wē we'wewa'ja's caaúusutje'j. ⁵²Nava judiuwe'shtyi nwe'weya'rráameene' tyá'wē uuya'va yu'. Dyus luuch mtee mteeva ústyna tyāawe'shtyiva pcjacjya'c tyá'wē uuya'va yu'. ⁵³Atsa' tyāajūjy judiu npiitstjē'jwe'sha' Jesusa's icjya' puuty we'wety.

⁵⁴Tyāa pa'gac Jesusa' Judiuwe'sh cshavysu u'juya' ājāmeerra', Judea quiwejū casejna u'j tyāa yacj u'jusawe'sh yā'jrra teech chjamb nasa u'pnmée ja'ndasu Efrain yaasesa úsu'c cytee úsya'.

⁵⁵Tyajū' Judiuwe'sh fiesta Pascua en ājatscu yu'. Atsa' wala cuj nasa' u'jty Jerusalenna, Pascua fiesta ājmeyna tyāawe'sh cacuete pcaltyi yaaterra úsya'.

⁵⁶Cyte' Jesusa's pacuena yā'jty ús yu' sa' dyuus yatte na'wēty puuty paapēyi':

—¿Ma'jīqui'cue? Jesusa' fiestate úsya' ¿yujmañ?

⁵⁷Tyajū' fariseowe'sh vite' sacerdote npiitstjē'jwe'sha' neewe'wety maarráava Jesusa' fiestate úste jiyurra' tyāawe'shtyi pta'shcajn tundyá' caajya'.

Wēt putasa's Jesus chindacjē teech u'y awni

(Mt. 26.6-13; Mr. 14.3-9)

12 ¹Pascua fiesta ājya' seis en peejiyna, Jesusa' Betania chjambna u'cj, Lasaro uuniiteva ityi vitcu cytee. ²Cyteea' ū'wa'lj pjeu'jty Jesusna wechana, naapcachja' Marta yu' puutsutssac yu'. Atsa' Lasaro' Jesus yacj cachcu ū'ya'. ³Tyajū' Maria' teech libra ājc wēt putasáa wala pa'gasa's jyūna pa'jrra', Jesus chindacjē shūshrra', tyajy dycjasjuc andyi'. Atsa' yat dyyiite tyāa wēt putasarráa jyuca utac.

⁴Tyajū' Jesus yacj u'jusa Simon nchi'c Judas Iscariote yaasesa' Jesusa's icjcajn ducjwa'jsa' na'wēc we'we:

⁵—¿Ma'wētequi'c naa u'ya' wēt putasa's tres cientos pesote tyweyrra nasa puuplesaty peesu'tsmée? jīc.

⁶Nava Judasa' puuplesaty pees jytjāasrra tyā'jītsme!. Tyā' vyuu jyaawsac yu', nava vyuu pcjajcinity quim yujva jiyunimée paatste ncuutyi'ji'u'ga, tyāasac tyā'wē we'we'.

⁷Tyajū' Jesusa' na'wēc we'we:

—Naa u'ya's tyā'wē yuja' we'wewa'j jī'pjmeeng. Naa wēt putasa's andy cacue's pendaatstewe'shcu jyaawni jī'pju'. ⁸Puuplesa' bagachteva i'cue'sh yacj nes yuutyna. Nava andya' jwee yu' i'cue'sh yacj nes yuuwa'jsameetj jīnac pta'sh.

Lasaro's icj wēeni

⁹Jesusa' Betaniate ūsa' jīni's jiyurra', judiuwe'sh wala cujsa pcjaacjerra Jesusa's tjengya' tyāa chjambna u'ljty. Nava Jesusrrá's tjengya' u'jmée, Lasaro's ja'ndaty tjengya' u'lj, tyā'sa' uuniiteva Jesusa' qui' ityi vitcu tyāa pa'ga. ¹⁰Tyajū' sacerdote npiitstjē'jwe'sha' puuty we'wety Lasaro'sva icjya', ¹¹tyā's Jesus ityi vitpa'garráa judiuwe'sh wala yā'j tyuteerra Jesus yacjtyi u'juets yu' naa pa'ga.

Jerusalente Jesus u'cani

(Mt. 21.1-11; Mr. 11.1-11; Lc. 19.28-40)

¹²Jerusalente Pascua fiestate nasa wala pa'tja. Sa' cuscus encjē' Jesusva Jerusalente fiestate pa'jana jīni's jiyurra', ¹³lamus ets spē'tjrra Jesusa's pu'tjengya' casejty. Sa' nal'jīnaty sus we'we':

—iDyus tyacue ewte, teech yuja' Dyus caajni, Israelwe'shtyi Jycaajsa wala ewsa! jīnaty wechá'.

¹⁴Tyajū' Jesusa' teech burru ūste uyrra', tyāatec a'jrra u'lj, Dyus librute na'wē fil'jni' tyāa cytey yuucajn:

¹⁵Ūucjnuwe, Sion chjambtewe'sh.

Mtjengwe, i'cue'shtyi Jycaajsa yuja', teech burrute a'jrra jīnac fil'jni yu'.

¹⁶Tyāapcachjīi yu', Jesus yacj u'jusawe'sha' jiyumeeta' tyā'wē yūuni's. Nava Jesus cielun u'jnite', jiyuty tyā'wē fil'jni' cytey yuuteva.

¹⁷⁻¹⁸Tyā'wē uusá's Jesus ityi vitpa'gaty nasa jiyuwēesa' tyacue wala pu'tjengya' casej, Lasaro's ityi vitutste' cytee ij tjengna ūssa' jiimeesatyva pta'shne'ta tyāa pa'ga.

¹⁹Tyajū' tyā'wē nasa pu'tjengya' casejpa'garráa fariseowe'sha' nal'jīnaty ūuscha we'we' tyāawe'sh pwe'sh:

—Mtjengwe vacy, quīj yujva yūuya' ājatsmeetja'w, naapcachrráa nasa' jyucay Jesus yacjrrarráa u'juetsta' jī'ty.

Greciajūwe'sh Jesusa's pacuení

²⁰Jerusalente fiesta ente jyu'lj quiwe Greciajūwe'sh pa'jrra ūsu'ty.

²¹Tyajū' Greciajūwe'sha' Galilea quiwesu Betsaidatewe'sh Felipe's utyaana cūjrra', na'wēty pytjaa we'we:

—Jesusa'stja'w puuty uy wēje' jīte', ²²Felipe' u'jrra Andresa's pta'shcu, sa' tyajū' e'nzsay Jesusa's pta'shya' u'jty. ²³Atsa' Jesus we'werra':

—Dyus Nchi'c Nasa Yuusa' uurra qui' ītyi yuuwa'l'j en ājatsa'. ²⁴Na'jī'tj na': Teech scuutyj ñīña' quiwete weterra uumeerra yu', pejnamée teechráa nes yuuna. Nava uurra bucharra', jweeírráa penana. ²⁵Maava naa quiwete ītyī fi'nzewa'jrrá's yaacysa' ptsuwa'jmée ītyī fi'nzewa'ja's iviitutyna. Nava naa quiwete ītyī fi'nzeni's yaacysame', ptsuwa'jmée ītyī fi'nzewa'ja's ji'pjutyna. ²⁶Maava andya's selpíi wēerra', andy yacj yuweena, sa' andy mtee ūste' tyāava cytey ūsya' ājana andyna selpiisa'. Atsa' maava andyna selpisaatyi's andy Tata' tuutje'jena.

Jesusa' tyajy uuwa'ja's pta'shni

²⁷Āchja' wala ñusna ūstju, sa' ¿ma'jītca? Meerra' Tata, andya's meen nwe'we pytjaa yuucajmen jīte, ewvānacy. Nava tyā'wē pytjaa yuuya'írráatj yuwé' na' tyā'jīme'nja. ²⁸Tata, maava indyna jiyuwa'jrrá's mcaavya'ja'j.

Tyajū' cielujū we'weni na'wēc ptjūuse:

—Andyna jiyuwa'ja's caavya'ja'jyā'tj. Nava maava andya's jiyucajn qui' caavya'ja'jya'vatj jīnic ptjūuse.

²⁹Atsa' nasa' tyā'wē cielujū we'weni's wēse'jrra':

—Cpi'shne' tyā'jī jī'ty, naapcachja' vite yu':

—Teech angelne' tyā'wē we'we jī'ty.

³⁰Tyajū' Jesusa' na'jīc:

—Tyā'wē we'weni' andyna pta'shna we'weme', i'cue'shtyi pta'shnac tyā'wē we'we jiyucajn. ³¹Āchja' naa quiwete jyucaysa yuuwesa yuuwa'l'j en ājc, naapcachja' naa quiwete jycaajna ūssa echtjē'l'j yu' peena yu' jycaajya' ājāwa'jmeete neeyūuna. ³²Tyā'wē andya's ēecjē qui'pnijū', jyucaytyi nwe'weya' ājā'nja.

³³Tyā'wē we'werrac caajiyul'j ma'wē uuya'varrava.

³⁴Tyajū' nasa' na'wēty we'we:

—Cue'sha' Dyus librate leya's iiwēse'tja'w, atsa' Cristo' bagachte yujva uuwa'jmée ītyi u'juwa'l'jsa' jī'c. Atsa' indya' ¿ma'wēnga Dyus Nchi'c Nasa Yuusa's ēecjē qui'pni yuuna jīna we'we'? Dyus Nchi'c Nasa Yuusa' ¿quimna? jīte', ³⁵Jesusa' na'jīnac pas:

—Eena'sa' i'cue'sh yacj nee ūsuna, nava manz enrráa ūsuna. Tyā'wēte' eena'te fi'nzewa'ja's mpa'gawe, eena'sa nee ūsiyna, cyaj chji'ndysa' i'cue'shtyi cpajcymeena. Tyā'wēme', chji'ndyte u'jusa' maa dyi'j ewsateva jiyuya' ājā'tsme'. ³⁶Nee i'cue'sh yacj ūsiyna, eena'sa's mjiyuwe, cyaj eena'te fi'nzesa yuune'cue.

Tyā'wē we'wena jyā'jrra', Jesusa' u'jrra vyaame'.

Judiuwe'sha' Jesusa's jypa'gameeta'

³⁷Quim yujva ājanimeesa's tyacue wala caavya'ja'tjeva, nasa' jiyuya' āja'tsmeeta' Jesus quimteva. ³⁸Nava Dyus yuwe pta'shsa Isaiás fi'jrra nviitni' cytey yuucajntyi tyā'wē yuu: Cyte' na'ljī'c:

Cue'sh pta'shni's ¿quimrrá' jypa'gata'?

Dyusa' tyajy ājani's ¿quimtyiga caavya'ja'j? jī'c.

Cristo's jiyuya' ājawa'jsameene'ta yu', tyāa pa'gac Dyus yuwe pta'shsa Isaiasa' tyā'wē fi'jrra nvijt.

³⁹Sa' Isaiasa' qui' we'werra':

⁴⁰Dyusa' tyāawe'sh yafytyi apjcu uyya' ājācjmén.

Sa' tyāawe'sh ūustyiva nuywejic jiyucajmen,

Sa' Dyus tashte shawendrra catyjiwa'ja'sva nvijtme' jī'c.

⁴¹Jesus ma'wē yuuwa'jsateva jiyurrac Isaiasa' tyā'wē we'wena fi'j.

⁴²Tyā'wēteva, judiuwe'sh wala cujsa Jesus quimteva jiyuty, maafi yu' npiitstjē'jwe'sh yā'jrra. Nava fariseowe'sh ajtserra tyāawe'sh pcjaacjenijū cuty'ljrra peena yu' pa'ljwa'jmée vitcaymen, āate yu' pta'shi'tsmeeta' ūucjrra. ⁴³Tyāawe'sha' nasaa tuutje'jnirrá's wejy ji'pju wēerraty tyā'wē yu'.

Ney pta'shcaajni's Jesus pta'shni

⁴⁴Tyajū' Jesusa' na'ljinac we'we:

—Maava andyna ūuste jypa'gasa', andyrráana jypa'gamée, andyna caajsa Tatanava jypa'gana. ⁴⁵Tyā'wēy maava andyna uysa', andy Tata'sva uysáa yuuna. ⁴⁶Andya' nasaty eena'te caafi'nze'lja'tj quij, cyaj andyna ūuste jypa'gasa' chji'ndyete neeyūumeetyna. ⁴⁷Nava maava andy pta'shni's wēse'jrrava cytey nwēese'jmeete', tyā'wē yūusa's ewmeete nviitwa'jsa' andymeetj. Andy yu' naa quiwetewe'shtyi ewmeete nvijitya' yuwe'tsmeetj, wejyva nwe'weya'tj yuwé'. ⁴⁸Andya's wa'lrra andy pta'shnityi' cytey yuumeete', tyā'wē yūusaty ewmeete nviitwa'jsa ūsa': āchj na'wē andy pta'shna we'we'tj tyāa pta'shnisa írráa ewmeete nviitwa'jsata' nmej ente'. ⁴⁹Tyāa pa'gatey andyrráa we'wena pta'shistsmeetj. Andyna caajsa Tatafiic tyā'wē pta'shcaja', ⁵⁰cyaj andya' jiiitj andy Tata we'weni' bagachte yujva ptsumée ityi caafi'nze'lja'wsateva. Atsa' andy Tata ma'wē pta'shcaatje', tyā'sna írráatj andyva pta'shi' jīnac we'we Jesusa'.

Jesusa' tyāa yacj u'jusawe'sh chindaty pcji'cyni

13 ¹Pascua fiesta ājya' teech enrúa pejiitscu yu'. Atsa' Jesusa' jiiic yu' naa quiwe's nvijtrra Ney tashna u'ljwa'j en āani's. Sa' naa quiwete tyāa yacj u'jusawe'shtyi' nyafiitey ma'wēne' peeygāj na', nmej entepcachcu peeygāj.

²Jesusa' tyāa yacj u'jusawe'sh yacj ū'na u'ppcachja', echtjē'ja' Simon nchi'c Judas Iscariote's caaūusutje'ljetsyā'cj yu' Jesusa's ewmeesa cusete ducjajcn.

³Atsa' Jesusa' jiiic yu' Dyus tashune' yuusa yu' sa' qui' Dyus tashnay u'ljwa'ja's. Sa' tyā'wēy jiiic yu' Dyus ma'wērraj jycaajwa'ja'sva tyāarrarrá's ducjni'sva.

⁴Tyajü' Jesusa' ũ'na u'píi quiitena'va, atyjna qui'prra, toalla's jytujndcu. ⁵Sa' cuse cjweechaniite yu' awna', mesate ij ũ'na u'psa chindaty pcji'cy'na, toallaju andy'i'c.

⁶Sa' Simon Pedro chindaty pcji'cy'ya'vate', tyã' na'wêc we'we:

—Cue'shtyi jype'jsa yuja', ¿andy chindaty pcji'cyma'ng? jíte', ⁷Jesusa' na'wêc pas:

—Ãchjîi yu' jiyumeene'nga na'wê yũuni's. Nava e'su' jiyune'nga.

⁸Tyã'jíteva, Pedro' qui' na'jïc:

—Indya' andy chindaty pcji'cywa'jsameeng jíte', Jesusa' na'jïnac pta'sh:

—Indya's pcji'cymeete', andy yacj ũ'sya' ãjameene'nga jíte', ⁹Simona' na'wêc pytjaa we'we:

—Tyã'wëyã'tje', chindarráaty pcji'cymée, cuse pety dyictjé yã'jrra meen pcji'cy jïc.

¹⁰Nava Jesusa' na'jïc:

—U'se pëwrra ũ'ssa', jyuca ateyã'tja', cyaj chindarráaty pcji'cywa'j peejyta'. I'cue'sha' ateyã'ji'cue, nava jyucasa yu' ate ũ'smeei'cue.

¹¹Jyucaysa yu' ate ũ'smeei'cue jïnac we'we, tyã's icjcajn ducjwa'jsa's we'werrac tyã'jî.

¹²Tyajü' Jesusa' tyãawe'sh chindaty pcji'cy'na jyã'jrra', atyja's jycajtsna' mesate qui' cachrra na'jïnac paapëjy:



(San Juan 13.5)

—¿I'cue'sha' jiyu'cue' andy tyā'wē i'cue'sh chindaty pcji'cyte'? ¹³I'cue'sha' andya'sa' caapiya'jsa, jype'jsa, jirra', isa yuj we'we'i'cue, andya' tyā'wēsa yujtj naa pa'ga. ¹⁴Andya' caapiya'jsa, jype'jsarrava i'cue'sh chindaty pcji'cytju atsa' i'cue'shva tyā'wēy chindaty puuty ya'pcji'cyna mfi'nzewe teehsa na'wērrarráa. ¹⁵Andy na'wēy yūuna fi'nzeczajntju i'cue'shtyi tyā'wē selpí. ¹⁶Isatj we'we', maava selpisa' tyajy patronte jytjaacuesame', atsa' tyā'wēy caajnisava tyā's caajsate jytjaacuesame'. ¹⁷Na'wē selpiwa'ja's jiyurra cytey yuuna fi'nzerra', wech wecha fi'nzene'cue.

¹⁸I'cue'sh jyucaysa yuutyi' tyā'jī'tsmeetj. Jiitj quimrraj andy tyjityjnisateva. Nava Dyus librute na'wē fi'jni ūsa': Andy yacj ij ūsarrava, andya's ajtserra quiicje'lja'va' jīna fi'jni' cytey yuucajntju tyā'jī'. ¹⁹Āchjīi pta'shitstju, cyaj cytey yuute', andya's ew jiyune'cue Dyus Nchi'cdyjiteva. ²⁰Isatj we'we': maava andy caajnisas' jypa'garra', andya'sva jypa'gasa yuuna. Sa' andyrráana jypa'gamée, andya's caajsanava jypa'gasa yuuna.

Judasa' Jesusa's ewmée yūuya' yaacyni
(Mt. 26.20-25; Mr. 14.17-21; Lc. 22.21-23)

²¹Tyā'jīna jyā'jirra', Jesusa' nūsñus yajcyrra āatec we'we:
—Isatj tyā'jī', i'cue'sh yacj u'jusa teehsa' andya's ajtserra ewmeesa cusete ducjya'va' jīc.

²²Tyājū' quimna tyā'jīteva jiyumeerra', dyi'p iisarráaty puuty tjengu' tyāawe'sh pwe'sh. ²³Teeehsa' Jesus pucate ij u'psa' Jesus wendynisac yu'. ²⁴Atsa' Simon Pedro' quimna tyā'jīteva jiyu wēerra', tyāa ij u'psa's cuseju pta'shcu paapēycajn. ²⁵Atsa' Jesus pucate ij u'psa' tupjirra na'jīnac paapējy:
—Jype'jsa, mpeeta'sh ¿quim indya's tyā'wē ajtserra ducjwa'jsana? jīte', ²⁶Jesusa' na'jīnac pta'sh:

—Pana's tuupja'jirra maana ūsu'nja tyāa andya's ducjwa'jsa' jirra', pana's tuupja'jna'va Simon nchi'c Judas Iscariote'scu ūs. ²⁷Atsa' Judasa' pana's jypa'gatspcachja', echtjē'ja' tyajy ūuste u'cac.

Atsa' Jesusa' Judasa's na'jīnac we'we:

—Quīj yūuya'varrava, dund cytey myuu jīte', ²⁸mesate ū'na u'psa' maa yujva jiyumeeta' tyā'wē we'weni's. ²⁹Maafí yu' na'wēty yaaqui': Judasa' vju jyaawsate', cyaj vá' Jesusa' fiestate peejiwa'ja's weycaja', meerrava puuplesaty vá' quijrráava peescaja' sūju'ty. ³⁰Naapcachja' Judasa' pana's ū'na'va casejna u'cj. Tyā'wē yuutste', chji'ndyni yā'cj yu'.

U'se jycaajnis

³¹Judas u'jni e'su', Jesusa' na'wēc pta'sh:
—Dyus Nchi'c Nasa Yuusá's āchja' tuutjel'jnic yuu, atsa' Nchi'cva Neyas' tuutjel'cj. ³²Dyus Nchi'c Nasa Yuusa' Neyas' tuutjel'jetspcachja', Neyva Nchi'cas' tuutjel'jena, nava āchjīi tyā'wē yuuya'va'. ³³Andy nchi'ccuēwe'sh, jwee yu' tyach ūsme'nja i'cue'sh yacj. Andya' judiuwe'shtyi nyafíi we'werra': I'cue'sha' andya's

pacueene'cue. Nava andy u'juetstju cyte' yujya' ajameene'cue jinatj we'we, sa' i'cue'shtyiva tyā'wēyrráatj we'we'. ³⁴I'cue'sh yacj nviitutstju u'se jycaajnis'a's, puuty ya'peeygājna fi'nzewa'ja's. Andy ma'wētca i'cue'shtyi peeygājna fi'nze', tyā'wēy i'cue'shva puuty ya'peeygājna mfi'nzewe. ³⁵Tyā'wē puuty ya'peeygājna fi'nzete', maa nasava jiyutyna i'cue'sh andya's nwēese'jsateva.

Pedro' ishiiwa'jsateva Jesus pta'shni
(Mt. 26.31-35; Mr. 14.27-31; Lc. 22.31-34)

³⁶Tyajü' Simon Pedro' na'jīnac Jesusa's paapējy:

—Jype'jsa, ¿mtee u'juetsnga? jīte', Jesusa' na'jīnac pta'sh:

—Andy u'juetstju cyte' yujya' ajameene'nga achjii' yu'. Nava e's yu' yuweene'nga jīteva, ³⁷Pedro' qui'quin paapējycu:

—Jype'jsa ¿qui'j yuurra achjii' yu' yujya' ajamée yuuiqui'tj? Andy uuwa'ja's yujva üucjya'mée üstju, indya's peeygāaweete jīte', ³⁸Jesus we'werra':

—¿Isanga tyā'jī'á'? Nava andya' na'jī'tj na': atall we'wemeyna, andya's jiimeetj jīna tecj us ishijatsyā'j yuune'nga jīc.

Jesusa' Dyus tashte caapa'ja'jwa'jsa

14 ¹Jesusa' na'jīc:
—I'cue'sh üuste fiicājna ñismée meswe. Wejy yuuva Dyusrrá's yajcyna meswe, sa' andynava tyā'wēyrráa yajcyna meswe. ²Andy Tata üsnite', jycaasena üswa'j wala üsa'. Tyā'wē méevatsa', meea' jīna pta'shni yā'j yu'nja i'cue'shtyi. Tyāa pa'ga i'cue'sh cytee pa'jwa'ja's pjeu'jya' u'juetstju. ³Sa' u'jrra cytee i'cue'sh pa'jwa'ja's pjeu'jrra', qui' shawendu'nja i'cue'shtyi pe'jna u'jya', cyaj i'cue'shva andy üsnitey andy yacj ij üsune'cue. ⁴I'cue'sha' jii i'cue mtee u'juetsteva, sa' dyi'jnava jii i'cue.

⁵Tyajü' Tomasa' na'jīnac pējy:

—Jype'jsa, mtee u'juetsne'nga nava cue'sha' jiimeetja'w, sa' dyi'ja'sva jiimeetja'w jīte', ⁶Jesusa' pta'shcu dyi'ja's:

—Andy yuurráa Dyus tashte caapa'ja'jwa'jsatj, sa' andy yuurráa caypumba'jwa'jsameetj, sa' andy yuurráa i'tyi caafi'nze'jwa'jsatj. Atsa' andypa'ga yuurráa maava andy Tata tashte pa'jya' ajatyna. ⁷I'cue'sha' andya's jiyuvatsa', andy Tata ma'wēsateva jiyune'cue. Tyā'wērrava achja' jiyu i'cue, uyna üsi'cue tyāa andy Tata'. ⁸Tyāa andy Tata' jīte', Felipe' na'wēc pējy:

—Jype'jsa, iindy Tata's áate mcaavya'j cue'sh uycajn. Tyā'wērráa peejytja'w jīte', ⁹Jesusa' pta'shcu:

—Andya' i'cue'sh yacj nacue tyach üstju atsa' ¿achj pa'jva andya's jiyumey vá'nga? Andyna uysa', andy Tatanac uyu'. Atsa' ¿ma'wēnga Tata's mcaavya'j jīna pēyi'? ¹⁰Jiyu'tsmée vá'nga, andya' Tata yacj bagachteva nestju yu', atsa' tyā'wēy Tatava andy yacj nesa'. Na'wē we'we'tj na' peecy üusuj yajcyrra tyā'wē we'we'tsmeetj. Tata andy yacj üssa tyāa we'wecaatjerráatj we'we'.

¹¹Jiyurra mneeyüuwe: Bagachteva andya' Tata yacj e'nzsay ij nestja'w yu'.

Tyā'wē e'nzī ijne'ta fi'nze' sūjmeerrava, andy mjiinisarráatyva uyrra', Tata yacj ūssarrac tyā'wē ewsaty mji' sūjna mneeýúuwe. ¹²Isatj we'we', andyna ūuste jypa'gasa' andy na'wēy mjiiya' ājatyna. Nava tyā'wērráamée, andy mjiinite jytjaacue wala mjiiya' ājatyna, tyā'wē ājacajniírráa andya' u'juetstju Tata tashna. ¹³Sa' i'cue'sha' Tata's quíj pēywa'j j'i'prrava, andya's pēyine'cue atsa' andya' i'cue'sh pēyni's jyuca cytey yu'nja, cyaj Nchi'cpa'gate Tata wechani yuuna. ¹⁴Na'j'i'tj na': andya's quíj pējyveva jyuca cytey yu'nja.

Jesusa' Dyus Espiritu's caajya' neeyúuni

¹⁵I'cue'sha' andya's peeygājatsrra', andy jycaajnyti' nwēese'jna cytey myuuwe. ¹⁶Atsa' andy Tata's i'cue'sh pa'gate neewe'we'nja, i'cue'shtyi pu'chwal'jsa teech andy na'wēysa's caacjan. Tyā' Dyus Espiritu isasarrá's caajiyu'jsa' tyā' bagachteva i'cue'sh yacj nes yuuna. ¹⁷Naa quiwetewe'sha' tyāa Espiritu's uyya' ājameerra' jiyuya'va ājameetyna, tyāasa jypa'gaya'va ājameetyna. Nava i'cue'sha' jii yā'ji'cue, tyāa Espiritu i'cue'sh yacj ūsteva, sa' bagachteva tyutemée nes yuuna. ¹⁸I'cue'shrráaty nvijtya'vameetj. Qui' shawendu'nja i'cue'sh yacj ūsya'. ¹⁹Naajū' tyachmeynarráa nasa' andya's peena yu' uymeetyna. Nava andya' uuwa'jsameetj, tyāa pa'ga i'cue'shva uuwa'jsamee'cue, tyāasa i'cue'sh yu' andya's uyuune'cue. ²⁰Tyājū tyāa ente ew jiyune'cue andya' Tata yacj nes yuusateva, naapcachja' i'cue'sha' andy yacj'cue nes yu' atsa' andya' i'cue'sh yacj'tju nes yu'. ²¹Andy jycaajnyti nwēese'jna cytey yuuna fi'nzesa' andya's isa ūusuj jyuca yaacysarra tyā'wē yuutyna. Atsa' andy Tata' tyā'wē yūusatyi' peeygājana, atsa' andyva tyā'wē yūusatyi' peeygājra āate vyaana nes yu'nja.

²²Tyā'jite', Judas Iscariotemée, vite Judasa' na'wēc pējy:

—Jype'jsa, ¿quíj yuurra cue'shrráaty āate vyaarra', vite nasa naa quiwetewe'sh yuutyi' vyaamée yuuqui'ng? jite', ²³Jesus pasrra':

—Andya's ūusuj jyuca yaacysa' andy jycaajnyti nwēese'jna cyteytyi yu'. Atsa' tyā'wē yūusatyi' andy Tata' peeygāja'c. Atsa' tyā'wē nwēese'jsa yacj yu' nes yu'nja'w Tata yacj. ²⁴Nava andy jycaajnyti nwēese'jsame', andya's yaacysameerra tyā'wē yuuna. Na'wē andy caapiya'jnity wēse'ji'cue tyā' andyrráa caapiya'jnimeeta'. Andy Tata caapiya'jnita'.

²⁵I'cue'sh yacj nee ūsí na'wē pta'shitstju. ²⁶Nava Dyus Espiritu's Tata' cajana andy na'wēy i'cue'shtyi pu'chna ūscajn tyā' jyuca caapiya'jana. Sa' na'wē quíjva pta'shtju tyāatyi'sa' jyuca caayaquil'jina.

²⁷I'cue'sh ūuste wēt yajcyna fi'nzewa'ja's peesutstju. Naa quiwete wēt fi'nzewa'ja's nasa ūsu'ty tyā'wēsarrá's peesutsmeetj. Andy ma'wētca ūuste wētrráa yajcyna fi'nze' tyā's i'cue'shtyi peesutstju. Tyāa pa'ga fiicājna ūucjmée meswe. ²⁸U'jrra qui' shawendu'nja i'cue'sh yacj ūsya' jini's wēse'jyā'ji'cue na', andyna isa wendydijrra', wechwecha yaaquine'cue, tyāa pa'gatey andyte jytjaacuesa andy Tata tashna u'juetstju naa pa'ga. ²⁹Dyicjēy pta'shitstju, cyaj andy pta'shni cytey yuuna pa'tje', isa yuj pta'shi'ga sūjune'cue.

³⁰I'cue'sh yacj jwee yu' we'wena ũsya' ājame'nja, tyāa pa'gatey naa quiwete jycaajna ũssa echtjē'ja' andya's quījva yūuya' ājane'ljmeerrava, yuja'. ³¹Macue ājane'ljmeerrava cytey yuuna, cyaj naa quiwete nasa jyucaysa jiyutyna, andy Tata's nwēese'ljrra tyajy jycaajni's cytey yuusateva. Tyā'ljina jyā'ljrra', quiterra ayjyu u'ljuega jīc.

Maava Jesus yacj tyutemée fi'nzewa'lj

15 ¹Andyí ũ'tash na'wēsaj, atsa' andy Tata' tyāa tasha's pjeu'jsa na'wēsa'. ²Cu'ta yūnsameetyi' spē'tje'c, nava cu'ta yūnsatyi' sūupi'ljna pjeu'ju'c jytjaacue yūncajn. ³I'cue'sha' pjeu'jniyā'lj ũsi'cue andy caapiya'ljni's nwēese'lja'ga. ⁴Andy yacj tyutemée meswe, andyva ma'wē i'cue'sh yacj tyutemée ũstca tyā'wēy. I'cue'sha' peecy jii i'cue: cu'ta chpiterra ũssa' yūnu'tsme!. Tyā'wēy i'cue'shva andy yacj tyuteerra ũsrra', Dyus dyi'pte selpiiya' ājameene'cue.

⁵Andya' ũ'tash na'wēsaj atsa' i'cue'sha' ũ'tash cu'ta na'wēsa i'cue. Andy yacj tyutemée ũsrra', wala selpiine'cue. Atsa' andyva i'cue'sh yacj tyutemée fi'nze'nja. Andy yacjmée yu', i'cue'sha' quīj yujva yūuya' ājameene'cue. ⁶Atsa' ũ'tash cu'ta yūnsameetyi' ma'wēga spēetjē'tjrra ya'cambu', tyā'wēy ya'yūuna andy tashu tyutesatyi'.

⁷I'cue'sha' andy yacj tyutemée fi'nzerra andy caapiya'ljni's pechcanameerra', quījva pēyine'cue, atsa' ya'ūsuna. ⁸Andy caapiya'ljni's nwēese'ljrra' Dyus dyi'pte wala selpiiya' ājane'cue. Atsa' tyā'wē yūute', andy Tata's wala tuutje'ljni yuuna. ⁹Andy Tata' andya's wala peeygāja'c, atsa' andya' tyā'wēytju i'cue'shtyi peeygāja'. Atsa' andy peeygāanijū tyutemée meswe. ¹⁰Andy jycaajniy nwēese'ljrra', andy peeygāaniterrāa fi'nzene'cue, andyva ma'wētca Tata jycaajniy nwēese'ljrra' tyajy peeygāaniterrāa fi'nze' tyā'wēy.

¹¹Na'wētj pta'sh cyaj andy ma'wētca wechwecha yajcyna fi'nze', i'cue'shva tyā'wēy bagachva wechwecha yajcyna fi'nzene'cue. ¹²Andya' na'wētj jycaaja': andy ma'wētca i'cue'shtyi peeygāja', i'cue'shva tyā'wēy puuty ya'peeygājna mfi'nzewe. ¹³Namicu's nwe'weya' sūjrra peecy ityi fi'nzeni's iviitunisarrāa peeygāani yaase!. ¹⁴I'cue'sha' isa andy namicu dyijrra', andy jycaajni's cytey yuune'cue. ¹⁵Atsa' tyā'wē yūusatyi' peena yu' selpisāa jīna cysusme'nja. Selpisā' tyajy patron quīj yuuya'vateva jīiméc fi'nze!. Nava i'cue'sha' andy Tata we'wenityi' jyuca jii i'cue, tyāa pa'ga andyna selpisāa i'cue jīna cysusmée, andy namicu i'cue jīnarrāa cysusu'nja. ¹⁶I'cue'sh cjuē'y andya's tyjityjmeei'cue, wejyva andytju i'cue'shtyi tyjityj. Sa' i'cue'sh mteeva u'ljrra Dyus dyi'pte selpiina fi'nzecaajtju neewe'we', atsa' i'cue'sh tyā'wē Dyus dyi'pte selpiina u'ljuni' cyul yuumeena. Tyā'wē yūusatyi' andy Tata' jyuca ũsuna quīj pējyteva, andya's pi'cyrra pējyte!. ¹⁷Na'wē yūuwa'ja'stju i'cue'shtyi jycaaja': Puuty ya'peeygājna mfi'nzewe.

Jesus tyjitynisaty' naa quiwetewe'sh atseni

¹⁸Naa quiwetewe'sha' andya's nyafycjÿtyi ajtse na' i'cue'shtyiva tyã'wëyrráa atsetyna, nava ñusmëe meswe. ¹⁹I'cue'sha' naa quiwetewe'shvatsa', nasa' wenydytyna, tyãawe'sh pwe'sh ma'wëta wenydy' tyã'wëy. Nava andya' i'cue'shtyiva tyjitytju naa quiwejú, tyãa pa'gaty naa quiwetewe'sha' i'cue'shtyiva atse', naa quiwetewe'shmëe yã'ji'cue naa pa'ga. ²⁰Miiyajcywe andy na'jina we'weni's: Maava selpisá' tyajy patronte jytjaacuesame' jini's. Andya' i'cue'shtyiva jype'jsatj na's yujva icjya' pacue'ty na' i'cue'shtyiva tyã'wëyrráa icjya' pacueetyna. Sa' andy caapiya'jni's nwëese'jsa', i'cue'sh caapiya'jni'sva nwëese'jetyina. ²¹Andy pa'garráa i'cue'shtyiva pcyuutyna, andyna caajsa's jiyumeerra.

²²Dyus jycaajni's andy pta'shya' quijmeevatsa', tyãawe'sha' yuuwemeesa yuutyna. Nava ächja' andy pta'shni's jiyuty na' yuuwemeetja'w jija' äjameetyna. ²³Andyna atsesa' andy Tatanava atsesata'. ²⁴Tyãawe'sh cshavysu quim yujva vit-ya' äjanimeesa's andy caavya'ja'jmeevatsa', yuuwemeesa yuutyna. Nava macue tyã'wë andy äjani's caavya'ja'tje uyrrava, andyna atse'ty. Atsa' andyna atsesayã'j yu' andy Tatanava atsesata'. ²⁵Nava tyãawe'sh leyte na'wë fil'jni üsa': andyna ajtsety quijva yuuwemeeteva jic' tyã' cytey yuucanjtyi tyã'wë yu'.

²⁶Nava i'cue'shtyiva pu'chwa'jsa Dyus Espiritu isa ew caajiyu'jwa'jsa's andy Tata tashu cajaanja tyã' andy quimteva ew caajiyu'juna. ²⁷Atsa' i'cue'shva tyã'wëy andy quimteva pta'shine'cue, i'cue'sha' nyafii i'cue andy yacj üssa yu' naa pa'ga.

16 ¹I'cue'shtyiva pcyuute', ñusna wala cuj yaacyajmen na'wë pta'shitstju: ²ajtserra judiuwe'sh pcaacjenijü cutyil'jrra peena yu' jypa'gameetyna i'cue'shtyiva. Sa' tyã'wërráa yuumëe i'cue'sh maafityi' icjetyina, nava tyãawe'sh yu' Dyusa's selpiina üstja'w süjna tyã'wë yuutyna. ³Tyãa atsesawe'sha' andy Tata's jiiimeeta', sa' andynava jiiimeeta', tyãasa tyã'wë pcyuutyna. ⁴Atsa' cyajtj yatscjÿ tyã'wë pta'shi' na' tyã'wë yuuwal'j en äjte', andy pta'shni's yaaquine'cue.

Dyus Espiritu caajiyu'jni

Tyã'wë pcyuual'ja's nyafii yu' pta'shmeetj, tyãa pa'gately quijva meec yu' andy i'cue'sh yacj üste'. ⁵Nava ächja' andyna caajsa tashte ul'juetstju. Nava i'cue'sha' maa yujva pëyil'tsmeei'cue ¿mtee ul'juetsnga? jina. ⁶Tyã'wë pëjymeerra i'neerráa i'cue wala ñusu', andy ul'juetstju jina pta'shte'. ⁷Nava isatj pta'shi': andy ul'jmeete', i'cue'shtyiva pu'chwa'jsa' quijmeena. Nava andy ul'jrra, tyã's cajaanja. Tyãa pa'ga pejca ul'jwa'j yuj jil'ptju, i'cue'shtyiva pu'chwa'jsa's caajya'. ⁸Atsa' tyã' naa quiwete quijrra', nasaty Dyus dyi'pte yuuwe pcalsa yujtja'w süjwa'ja's caaüsusutje'jena. Sa' Jesusa' quijte yujva yuuwemëe ewsa maatyva jyuca nwe'wewa'jsa yuj yu'ga süjwa'ja'sva ew caajiyu'juna. Tyã'wëy yuuwesaty' Dyusa' ewmeete yuj nviituna süjwa'ja'sva caaüsusutje'jena. ⁹Maava andya's jypa'gaya' wal'pa'ga tyã'wë pcal yuuwesata'. ¹⁰Andya' maatyva jyuca

nwe'wewa'jsarraíi nwe'wewa'ja's vitna uurra andy Tata tashna u'tje!, peena yu' uymeene'cue. ¹¹Sa' yuuwesa' ewmeete neeyūuwa'jsane'tca'w sūjcajnīi naa quiwete jycaajna ūssa echtjē'j yuja'sva ewmeete yā'cj nviitni yuu.

¹²I'cue'shtyi wala pta'shwa'j ji'pjírráatj, nava āchjīi yu' ew jiyuya' ājameene'cue. ¹³Nava Dyus Espiritu quíjrra', tyāa ente i'cue'shtyi' jyuca ew caajiyu'juna, tyā' isa we'wenisarrá's caajiyu'jsa'. Tyā' peecyrráa we'wemée, Dyus cwe'we'jnrá's pta'shina, sa' quíj yuuya'vateva dyiicjēy caajiyu'juna. ¹⁴Andy ma'wēsateva ew jiia' na' tyāasa i'cue'shtyiva caajiyu'juna, andya's tuutje'jsa' naa pa'ga. ¹⁵Andy Tata ma'wēsate!, andyva tyā'wēysa írráatj. Tyāa pa'ga Espiritu' andy ma'wēsateva wejy ew caajiyu'juna jīnatj pta'shi'.

Ñuswa'j en scjēwte!, wecha en pa'jni

¹⁶Āchja' andy Tata tashna u'jwa'j ājātsa', atsa' andya's uymeene'cue. Nava vite encjē' andya's qui' uyuune'cue.

¹⁷Tyā'jīte!, tyāa yacj u'jusawe'sha' na'wēty puuty ya'paapēyi':

—¿Ma'jírraqui'c tyā'wē we'we'? Āchja' andy Tata tashna u'jwa'j ājātsa', atsa' andya's uymeene'cue. Nava vite encjē' qui' uyuune'cue jī'c sa', ¹⁸¿quíj we'werraqui'c andy u'jwa'j ājātsa' jīna we'we'? nava cue'sha' jiyu'tsmeetja'w.

¹⁹Tyā'wē jiyuwēena ūsni's Jesusa' jiyurra' pta'shcu:

—Andy Tata tashna u'jwa'j ājātsa', atsa' andya's uymeene'cue. Nava vite encjē' qui' uyuune'cue jīnatj we'we atsa' ¿tyā'sna vá'cue i'cue'sh pwe'sh jiyu wēena puuty paapēyi'? ²⁰Isatj we'we': I'cue'sha' ñusna ū'nene'cue, atsa' naa quiwete nasa yu' wala wechaatyna. Nava i'cue'sha' macue ñusna ūsrrava, ñusu en scjēwte!, wechwecha neeyūune'cue. ²¹Na's mjiyuwe: U'yva nasa upyya'vate ātsa'atsrra', wala pytjaa yu'c acate. Nava luuch upyte!, wechaweete tyāa aca yuuni's pechcana'c. ²²Tyā'wēy i'cue'shva āchjīi yu' ñusu'i'cue. Nava andya's qui' uyrra', wechwecha yajcyna neeyūune'cue. Atsa' i'cue'sh wechwecha yaacyni's quim yujva cusa'jya' ājameena.

²³Tyā'wē andya's qui' uynijū!, tyajūyā'ja' jyuca jiisa andya's paapēywa'j jī'pjumeene'cue. Nava andy Tata yu'sa' quíjva jyuca pējyya' ājāne'cue andya's pi'cyrra, atsa' tyā' jyuca ūsuna. ²⁴Nava i'cue'sha' āchj pa'jva andy Tata's quíj yujva pēynimée i'cue andya's pi'cyrra. Mpējywe vacy, sa' jypa'garra' wala wechaane'cue.

Cristo' quíjnavá jyuca cnayni

²⁵Ejemplo yacjrráatj caaja'nda'jna pta'sh i'cue'sh jiyucajn. Nava āate pta'shwa'j en ājte!, peena yu' ejemplo yacj caaja'nda'jna pta'shme'nja, wejyva teejwend āaterrarráa pta'shi'nja andy Tata ma'wēsateva. ²⁶Tyā'wē āate pta'shwa'j en ājte!, i'cue'sh yuu andy Tata's pējyya' ājane'cue, macue andy yu' i'cue'sh pa'gate we'we pu'chmeeteva. ²⁷I'cue'sha' andya's wendyrra jypa'gai'cue, Dyus tashu yuusana sūjna. Tyāa pa'gac andy Tata' i'cue'shtyi peeygāja'. ²⁸Andya' Tata tashu casejrra, naa quiwete yuwe'tj, sa' āchja' naa quiwe's nvijrra qui' u'juetstju andy Tata tashna jīte!, ²⁹tyāa yacj u'jusawe'sha' na'ljity:

—Āchj yuurra' ejemplo yacj caaja'nda'jmée, teejwend äate pta'shna ūsngu. ³⁰Āchja' jiyutja'w, indya' quijnava jyuca jiing. Tyāa pa'gatja'w ew jiyu Dyus tashu yuusateva. Tyāasa quim yujva indya's paapēywa'j ji'pjmeeta' jite', ³¹Jesusa':

—Āchja' jiyu'cue'? jinac we'we. ³²Āchja' ena' ājc, atsa' āchjii i'cue'sha' teechna na'wērraj fiifii tyuteene'cue, sa' andyrrāana nviitune'cue. Nava andyrrāa yu' neeyūume'nja, Tata' andy yacj ūsa' naa pa'ga. ³³Tyā'wētj andy yacj fi'nzewa'ja's jyuca pta'shi', cyaj andya's neewe'werra', ūcjmée wētwe't yaaquine'cue. Naa quiwete' tjēyte nuste fi'nzewa'ja's ji'pjune'cue. Nava andya's chjāchja miijajcywe, tyāa pa'gatey naa quiwete ewmeesa's andya' cnayyā'tj naa pa'ga jic.

Jesusa' tyajy jype'jnisaty Dyus cusete neewe'weni

17 ¹Jesusa' tyā'wē pta'shna jyā'jrra', cielute pagayrra Dyus yacj puuty we'wec na'jina:

—Tata, ena' ājc. lindy Nchi'c quimteva nasa jiyucajn äate mcaavya'ja', cyaj Nchi'cva indya's äate caajiyu'juna nasaty. ²Nasa jyucaysaty jycaajwa'ja's andyna ūsngu, iindy ūsni yuutyi' jyucaysaty ptsuwa'jmée ityi fi'nzewa'ja's ūscajn. ³Atsa' ptsuwa'jmée ityi fi'nzewa'ja's ji'pju wēerra', teech Dyusrrāa ūsngu tyā'sna jiyuwa'j ji'pita', sa' tyā'wēy iindy caajnisā Jesucristo'sva jiyuwa'j ji'pita'.

⁴Andya' naa quiwetewe'shtyi' ew caajiyu'tj indy ma'wēsateva, sa' indy mjii caajni's jyā'jyā'tj. ⁵Tata, naa quiwe meetey ma'wētca'w cielute ij wechana ūsu', āchja' tyā'sa' qui' maj cytey ij wechana ūswa'ja's.

⁶Naa quiwejū maafityi' tyjityngu, atsa' tyāawe'shtyi' caajiyu'tj indy ma'wēsateva. Tyāawe'sha' iindy jiiity yu', nava andy jype'cjannu ūs, atsa' tyāawe'sha' nwēese'jty iindy jycaajni's. ⁷Sa' na'wē quiqūijva yūuya' āja'tj tyāa ājanisa' iindy jycaajnityna sūjwa'ja's ji'pjuty. ⁸Indy yuwe pta'shcaajng tyā'sa' pta'shtju, atsa' tyāawe'sha' jypa'garra ūuste yu'acjtyi. Sa' andya' Dyus caajnisā iindy tashuj yuusateva jiita'.

⁹Andya' tyāawe'shtyi' iindy cusetetj nvijtna neewe'we'. Naa quiwete indya's jiimeesa ūsta' tyāawe'sh pa'gate neewe'we'tsmeetj. Andy jype'cjan ūsngu tyāawe'sh pa'gaterrāatj neewe'we', tyāawe'sha' iindy jiiita' naa pa'ga. ¹⁰Jyuca andy ji' iindy jiiirrarrāata'. Atsa' jyuca iindy ji' andy jiiirrarrāata'. Tyāawe'shpa'ga yuurraatj tyacue wala wechaawa'ja's ji'pju.

¹¹Andya' naa quiwete tyachmeerrāa ūswa'j ji'pitju. Nava tyāawe'sha' naa quiwete neeyūutyna, naapcachja' andya' yujtj indy yacj ūsya'. Tata, andyna ūsngu tyāawe'shtyi meen jype'l jypa'yacy, cyaj teechna na'wērraj indy yacj tyutemée fi'nzetyna andyva ma'wētca indy yacj tyutemée fi'nze' tyā'wēy. ¹²Andya' naa quiwete tyāawe'sh yacj ūsra', indy pu'chte' jypa'yacytju jype'jna fi'nze andya's jype'cjan ūsngu tyāawe'shtyi's. Atsa' jyucaysa yu' vitumeeta', naasāa teech vituwa'jsane' yu' tyāa yuurraac vitu, Dyus libruete pta'shna fi'jni' cytey yuucajn.

¹³Āchja' yujtj indy ūsngu cyteey. Nava naa quiwete nee ūsii tyā'wētj indya's neewe'we', cyaj tyāawe'sha' ūcjmée wechana fi'nzetyna, andyva na'wētj wechana fi'nze' tyā'wēy. ¹⁴Iindy pta'sh caajni's pta'shtju andy jype'jnisatyi', nava

naa quiwetewe'sha' tyāawe'shtyi atse'ty, andy jype'jnisawe'sha' andy na'wēy naa quiwetewe'shmeeta' naa pa'ga. ¹⁵Andy jype'jnisatyi' naa quiweju mcuutyi' jī'tsmeetj, naasáa echtjē'j caypumba'cjamen meen nwe'we jīnarráatj neewe'we'. ¹⁶Andya' naa quiwetewe'shmeetj, atsa' tyāawe'shva naa quiwetewe'shmeeta'. ¹⁷Tyāawe'sha' iindy jīrráa yuucajn indyrráa jype'jene'nga, isasa's caapiya'jna. Iindy caapiya'jni' caypumba'jwa'jsame'. ¹⁸Indyva ma'wēnga andya'sa' naa quiwete caaj, tyā'wēy tyāawe'shtyiva cajastju. ¹⁹Sa' tyāawe'sh pa'gate andyva iindy cusete neeyūutstju, cyaj tyāawe'shva iindy jype'jwa'jyā'j neeyūutyna.

²⁰Tyāawe'sh pa'gaterráa neewe'wetsmeetj. Tyāawe'sh iindy yuwe's pta'shte', maava indya's jiyuwa'jsa ūstyna tyāawe'sh pa'gate ja'ndatj neewe'we'.

²¹Tyāawe'sh jyucaysa teehsa na'wērrarráa yajcyna cue'sh yacj tyutemée' fi'nzecajntju neewe'we', Tata, indyva na'wē andy yacj fi'nzena ūsngu atsa' andyva indy yacj fi'nzena ūstju tyā'wēy yuucajn. Tyā'wē yuurra teehsa na'wērrarráa ij fi'nzetya, cyaj naa quiwetewe'sha' jiyutyna andya' iindy caajnisateva. ²²Indy yacj ij fi'nzewal'ja's andya's ūsngu atsa' tyāawe'shtyiva indy yacj ij fi'nzewal'ja's andya' ūstju, andyva indy yacj ma'wētca'w teehrráa na'wē fi'nze' tyā'wēy ij fi'nzecajn. ²³Andya' tyāawe'sh yacj fi'nzete', indyva andy yacj fi'nzene'nga, cyaj tyāawe'sha' teehrráa na'wēsa yuutyna. Atsa' tyā'wē yūute', naa quiwetewe'sha' jiyutyna andya' iindy caajnisateva. Sa' andya's ma'wēnga peeygāja', tyā'wēyngu peeygāja' naawe'shtyiva.

²⁴Tata, andya's jype'cjan ūsngu atsa' tyāawe'shtyi' andy ūsnitey ijtj ūs jytjāasu', naa quiwe meetey andya's peeygājrra wechana jype'jna ūsu'ng tyā'sa' uycajn. ²⁵Tata, indya' wala yuj ewsateva, naa quiwetewe'sha' indya's jīimeeta'. Nava andy yu' jīitj, atsa' andy jype'jnisava jīita' andya' iindy caajnisateva. ²⁶Andy jype'jnisatyi' caajiyu'tj indy quimteva, sa' caajiyu'jna nes yu'nja, cyaj indy andya's peeygāani' tyāawe'sh ūuste nes yuute', andyva tyāawe'sh ūuste nes yu'nja.

Jesusa's preesu'jni

(Mt. 26.47-56; Mr. 14.43-50; Lc. 22.47-53)

18 ¹Jesusa' tyā'wē neewe'wena jyā'jrra', Cedron yu'cuten ctejcana u'cj, tyāa yacj u'jusawe'sh yā'jrra' teech walta ūsa' cytee u'caya'. ²Tyāa waltate' Jesus yacj u'jusawe'sha' manz usva tyāa yacj pcjaacjeya' u'casaty yu', naa pa'gac Jesusa's icjcajn ducjwa'jsa Judasa' jii yu'. ³Tyāasac Judasa' jiiyā'jrra', soldauwe'shtyi pe'jrra' cytee pa'j u'j dyuus yat tjengsawe'sh yā'jrra'. Tyāa dyuus yat tjengsawe'sh yu', sacerdote npiitstjē'j vite' fariseowe'sh jycaajnyty yu'. Vite' fytū, vite' cchill, vite' lampara atrraty pa'j. ⁴Nava Jesusa' tyā'sna ma'wēva pcyuurra icjwa'j ājte jiiyā'jrra', puuty uyya' casejc. Sa' na'ljic:

—¿Quimnacue pacué'? jīte', ⁵tyāawe'sha' na'wēty pas:

—Jesus Nasaretjuwe'sha'stja'w pacué' jīte', Jesusa' na'ljic:

—Andyí tyāatj.

Atsa' Judasva cytee tyāawe'sh yacj ūsu'c, Jesusna cuuwe'jna. ⁶Tyajū' andyítj jīna Jesus we'weniterráa, Jesusa's tundwa'jsa' e'su ya'scarra quiwegaty wete. ⁷Atsa' Jesusa' qui' pējyacu:

—¿Quimnacue pacué'? jīte!, tyāawe'sha'!

—Jesus Nasaretjuwe'sha'stja'w pacué' jīnaty pas.

⁸Atsa' Jesus pasrra'!

—Andyítj jīna pta'shyā'tj. Atsa' andya's pacueetsrra', andy yacj u'jusawe'sh ayte ūsta' tyāawe'shtyi' cuch yuunuwe u'cjan jīc.

⁹Jesusa' nyafii we'werra': Tata andyna jype'cjan ūscu tyā' jyucaysa yu' vitumeeta' tyā'jīni' cytee yuucajncu tyā'jī.

¹⁰Naapcachja' Simon Pedro' cchill ya'cynisa's jycuutyi'jrra teech pitstjē'j tǰū'wē patsuwe'sha'scu spē'tj. (Tyāa pitstjē'ja' sacerdote npiitstjē'ja's selpisáa Malco yaasec yu'.) ¹¹Atsa' Jesusa' Pedro's na'jīnac jycaaj:

—Cchilla's vainutey myu'acj. Andy ñuste pytjaa yuuwa'ja'scu Tata' jytjáasu' atsa' tyā'sa' jypa'gawa'jsameena sǰju'vá'nga jīc.

Jesusa's Anas tashna jyūna u'jni

(Mt. 26.57-58; Mr. 14.53-54; Lc. 22.54)

¹²Tyajū' soldau npiitstjē'j tyajy nasa yacj vite' dyuus yat tjengsawe'sh yā'jrra Jesusa's tundrra', ¹³Anas tashna cjuē'y jyūna u'jty. Tyāa Anas nduj Caifasa' sacerdote npiitstjē'cj yu' tyāa añute. ¹⁴Tyāa Caifasíc judiwe'shtyi na'jīna we'wesa yu': Nasa jyucaysa pa'gate teech pitstjē'jrráa uuvats wejy ewna jīsc yu'.

Pedro ĩshiini

(Mt. 26.69-70; Mr. 14.66-68; Lc. 22.55-57)

¹⁵Jesusa's tundrra jyūna u'tje', Simon Pedro' vite pitstjē'jyā'jrra Jesus e'stey u'cj. Tyāa vite pitstjē'j yu' sacerdote npiitstjē'j yacj jīisac yu', tyāa pa'ga tyāa npiitstjē'jsa yat patyute u'cac Jesus u'canitey. ¹⁶Nava Pedro' u'camée vity pucate neeyūuc. Tyāasac sacerdote npiitstjē'j yacj jīisa' cytee vityte tjengsa yacj puuty we'werra Pedro's dyyite ca'ga'j. ¹⁷Atsa' vityte tjengsa' pējyacu Pedro's:

—Indya' ¿naa pitstjē'j yacj u'jusameengá'? jīte!, Pedro pasrra'!

—Tyāa yacj u'jusameetj jīc.

¹⁸Tyajū' cytee selpisaawe'sh vite' dyuus yat tjengsawe'sh yā'jrra cumarra ipy yutjrraty bajchna ūsu' patyute. Atsa' Pedrova cytee tyāawe'sh yacj ipy pucate bajchna ūsu'c.

Anas Jesusa's paapēyeni

(Mt. 26.59-66; Mr. 14.55-64; Lc. 22.66-71)

¹⁹Tyajū' Anasa' paapējyja' tacjcu Jesusa's:

—Indy yacj u'jusawe'sha' ¿quimtyna? atsa' indya' ¿quĩnga caapiya'ja'? jīte!, ²⁰Jesusa' na'jīnac pas:

—Andya' äaterrarráa iiwe'wetj nasa jyucaysa dyi'pte, judiuwe'sh pjaacjenisu vite' dyuus yatte judiuwe'sh jyucaysa cshavyte Dyus yuwe's caapiya'jna. Andya' paatste yu' quíjva iipta'shmeetj. ²¹Atsa' andya's çquíjya'nga paapëyi'? Andy pta'shni's wëse'jsaty mpaapëjy, atsa' tyäawe'sha' pta'shityna andy quíj we'weni'sva. Tyäawe'sha' andy pta'shni's jiita' na'.

²²Tyā'wë we'wete', dyuus yat tjengsawe'sh teeç cytee üssa' cuseju Jesus dyi'pga pejtyarra', na'wëc juuna' we'we:

—Anasa' sacerdote npiitstjē'ja' ats yuja' çtyā'wë pasu'ngá'? jīte', ²³Jesus pasrra!:

—Andy ewmée we'wete', mpeeta'sh quíjsu ewmée we'wetsteva. Nava ewsarrá's we'wetste', çma'wētenga andya's tyā'wë pcyú'? jīnac pas.

²⁴Tyā'wë yūunijū' Anasa' Jesusa's tundni üsīin, jyūna u'cjaacj sacerdote npiitstjē'j Caifas tashna.

Pedro qui' īshiini

(Mt. 26.71-75; Mr. 14.69-72; Lc. 22.58-62)

²⁵Naapcachja' Pedro' ipy pucate bajchna üsīrráac yu'. Atsa' cytee üssawe'sha' na'wëty pëjy:

—Indya' çnaa pitstjē'j yacj u'jusa yuj meenga vacy? jīte', Pedro':

—Andya' tyāameetj jīnac pas.

²⁶Atsa' sacerdote npiitstjē'ja's selpisáa teeçsa' na'jīnac pëjy:

—Indya's çuymeevá'tnca waltate tyāa yacj üste? (Tyā'jīna pëysa' Pedro teeç pitstjē'j tjū'wë's spë'tjcu tyāa pitstjē'j nwe'shcu yu'.)

²⁷Tyā'jīna qui' pëjyte', Pedro' qui'quin īshijatspcachja', atalla' we'wec.

Jesusa's Pilato tashna jyūna u'jni

(Mt. 27.1-2, 11-14; Mr. 15.1-5; Lc. 23.1-5)

²⁸Tyājū' Caifas yatu Jesusa's jyūna u'jty ne'jue'sh Pilato tashte nuypa'jya'. Naapcachja' cjicjiitscu yu'. Tyājū' judiuwe'sha' ne'jue'sh u'pnite u'cameeta', pcal pëetjeejena sūjrra. Tyā'wë pcal pëetjeetje', Pascuatewe'sha's ü'ya' ājame'nja'w sūjrraty u'camée. ²⁹Tyāa pa'gac Pilato' eca casejrra' na'jīna paapëjy:

—Naa pitstjē'ja' çquíjga yuu ats tyā'wë päatyjī'cjna yujcye? jīte',

³⁰tyāawe'sha' na'wëty pas:

—Quíjva yuuwemeevatsa', iindy tashte nuypa'jwa'jmeene'tca'w yu' jīte', ³¹Pilato' na'jīnac jycaaj:

—Jyūna me'jwe, sa' i'cue'sh ley ma'wë jycaatje', cytey yuune'cue jīte', judiuwe'sha' na'jīnaty we'we:

—Cue'sha' judiuwe'shtja'w na' çma'wë icj caajya' ājacytja'w?

³²Jesusa' ma'wë uuwa'jsarrava pta'shcu tyāa pta'shni' cytey yuucajnty tyā'jīna we'we.

³³Tyājū' Pilato' tyajy u'pnite qui' cūjrra', Jesusa's pa'yarra na'wëc paapëjy:

—çIndya' judiuwe'shtyi jycaajsavá'nga? jīte', ³⁴Jesusa' na'jīc:



(San Juan 18.29)

—¿Iindy úusuj yajcyrranga tyā'jī'á? meerra' ¿vitesa tyā'jīna andya's cysuusni's wēse'jrravá'nga tyā'jī'? jīte', ³⁵Pilato' na'wēc pas:

—Andya' judiumeetj. Iindy nwe'sh vite' sacerdote npiitstjē'jwe'shtyi andy tashte indya's nuycūj, atsa' indya' ¿quijnga ewmée yūu? jīte', ³⁶Jesusa' pta'shcu:

—Andy jycaajwa'ja' naa quiweteme'. Tyā'wē naa quiwete jycaajwa'jsavatsa', andy ju'ngusawe'sha' puiiwa'jne'ta yu', judiuwe'sh cusete andya's ducjajmen. Atsa' naa quiwete jycaajsameetj.

³⁷Tyā'jīte', Pilato' qui' pējycu:

—Tyā'wērra' ¿indya' jycaajsa dyijngá'? jīte', Jesusa' na'jīc:

—Indy cysusu'ng tyā'wēitj. Naa quiwete upyrra isasarráana pta'shya'tj yuwé'. Maava isasa's nwēese'jwa'jsa' andy we'weni's jypa'yacytyi wēse'je' jīte', ³⁸Pilato' na'wēc paapējy:

—Na'wē isasa' jīna we'we'ng tyā' ¿quijna?

Jesusa' icjwa'j yuuni

(Mt. 27.15-31; Mr. 15.6-20; Lc. 23.13-25)

Tyā'wē Jesusa's paapējyrra', Pilato' qui' eca casejc judiuwe'shtyi na'jīna pta'shya':

—Naa pitstjē'j ewmée yūuni's quijte yujva uyu'tsmeetj. ³⁹Nava Pascua fiesta iisa teech preesu caatyjweete'je'i'cue na' ¿achva tyā'wēy tyjweete jytjāasu'cue' naa judiuwe'shtyi jycaajsa's? jīte', ⁴⁰jyucaysa na'jīty:

—Tyā'sa' caatyjweete'jnu. Barabasrrá's mcaatyjweete'j jīnaty weyi'.

Tyāa Barabasa' iiméj jytjaacue pesweesac yu'.

19 ¹Tyajũ' Pilato' Jesusa's jyũna u'jrra pechuucuecaacj. ²Atsa' soldauwe'sha' tsjũtsjna tandy vitrra Jesus dyictjete caaficje'jty, sa' atyj bejsa's caapã'chi'jrraty na'ji':

³—¡Viva, judiuwe'shtyi jycaajsa! Tyã'jĩrraty dyi'pga petyaatya.

⁴Tyajũ' Pilato' qui' eca casejrra' na'wēc we'we:

—Mtjengwe, naa pitstjẽ'ja' ayte ũsa', nava tyã'sa' macue paapẽjyrrava tyajy ewmée yũuni's uymeetj.

⁵Tyã'jĩ yã'tje!, Jesusa' casejc dyictjete tsjũtsja's tandyrra caaficje'jni, sa' atyj bejsa's caapã'chi'jni. Atsa' Pilato' na'jĩnac we'we:

—Ãchja' ayte ũsa' tyã pitstjẽ'ja's mtjengwe.

⁶Tyã'jĩte!, sacerdote npiitstjẽ'jwe'sh vite' dyuus yat tjengsawe'sh Jesusa's tjengrra' na'jĩnaty sus weyya' quiite:

—Cluuste mcaafyutsu'j, cluuste mcaafyutsu'j jĩte!, Pilato' na'jĩc:

—I'cue'sh jypa'garra cluuste mfyutswe. Andya' qui'j yujva ewmée yũuni's jiyuya' ajameetj jĩte!, 7judiuwe'sha' na'jĩnaty we'we:

—Cue'sha' ley ji'ptja'w tyã leya' icjaja'c, Dyus Nchi'ctju jĩna u'ljupa'ga.

⁸Tyã'jĩni's wěse'jrra', Pilato' jweeĩrráac wala ũucjwa'j ji'pju. ⁹Sa' tyajy u'pnite u'carra', na'jĩnac Jesusa's paapẽjy:

—Indya' ¿majũwe'shnga? jĩteva, Jesusa' pasme'!

¹⁰Atsa' Pilato' na'jĩc:

—¿Andya's qui'j yuurranga pasu'tsmée? ¿Jiimeevá'nga? andya' cluuste fyutscajn jycaajya'va ajawa'jsatj, sa' tyã'wěy caatyjweete'jya'va ajawa'jsatj jĩte!, ¹¹Jesusa' pascu:

—Dyuspa'gameevatsa', indya' qui'jya'yujva ajawa'jsameeng andya's. Nava iindy cusete andya's ducjsa' indyte jytjaacue yuuwesa'.

¹²Tyã'jĩna we'wenijũ' Pilato' wala pa'pchuc Jesusa's tyjweetewẽerra. Nava judiuwe'sha' na'jĩnaty sus we'we:

—Naa pitstjẽ'ja's tyjweterra!, jycaajsa Cesar namicumée yuune'nga. Maava fiy jycaajsa' tyã' Cesar ju'ngusame'!

¹³Tyã'jĩni's wěse'jrra', Pilato' Jesusa's ecate pe'jna u'jrra', jycaajna u'pnite cachcu. Tyã jycaajna u'pni' Gabata yaasec yu' hebreo yuwete. Tyã' Cuet Fyutsni jĩni'. ¹⁴Pascua fiesta ajatstec tyã'wě yũuna ũsu'. Tyajũ' Pilato' na'wēc we'we judiuwe'shtyi:

—I'cue'shtyi jycaajsa' ayte ũsa' jĩte!, ¹⁵tyãawe'sha' na'wěty sus we'we:

—¡Peecy uuna, cluuste mfyuts! jĩte!, Pilato' na'wēc we'we:

—I'cue'shtyi jycaajsa yuja's, ¿ma'wě cluuste fyuts cajuqui'tj? jĩte!, sacerdote npiitstjẽ'jwe'sha' na'wěty we'we:

—Cue'shtyi jycaajsa' Cesar yuurrá'. Vite jycaajsa yu' ji'pjmeetja'w.

¹⁶Tyã'wě we'we yã'tje!, Pilato' Jesusa's tyãawe'sh cusete cluuste fyutscajn ducjte!, jyũna u'jty.

Jesusa's cluuscjē fyutsrra icjni

(Mt. 27.32-44; Mr. 15.21-32; Lc. 23.26-43)

¹⁷Jesusa' tyā'sna fyutswa'lj cluusa's yacjrra chjambu casejna u'cj, teeche ajte Gólgota yaase' cytee pa'j. Tyāa Gólgota yu', Uusáa Jycuet Dyi'tj jīni' hebreo yuwete'. ¹⁸Cytee pa'jrra' Jesusa's cluuste fyutsty, vite e'nz pitstjē'jty tyā'wēy, Jesusa's pyājte tyajrra. ¹⁹Tyājū' Pilato' cluus cajcuete na'wēc qui'p caaj: Jesus Nasaretjuwe'sh, judiwe'shtyi jycaajsa jīna fi'jni's. ²⁰Atsa' cluuste fyutsni' chjamb utyatec yu', naa pa'ga maanzcuēe judiwa tyāa fi'jni's tjengu'ty. Tyāa fi'jni', hebreo, griego, latin yuwejuc fi'jni yu'. ²¹Atsa' sacerdote npiitstjē'jwe'sh vite' judiu npiitstjē'jwe'sha' na'jīnaty Pilato's paatyjī'cj:

—Judiuwe'shtyi Jycaajsa jīna fi'j na'wē, Andya' Judiuwe'shtyi Jycaajsatj jī'c jīna fi'jvatsa', wejy ewna.

²²Nava Pilato pasrra' na'jīc:


—Andy tyā'wē fi'jni's quim yujva yu'ptjejmeena.

²³Tyājū' soldauwe'sha' Jesusa's cluuste fyuts yā'jrra', Jesus atjni's pajnzsa tyu'ndendety soldau iisa teecheech. Sa' atyja'sva tyā'wēytyi yūu wēe, nava tyā' teejwendsarrāac yu' catsnimeesa. ²⁴Atsa' soldauwe'sha' na'wēty puuty we'we:

—Tyā's sundeya'mée suerte cajanja'w quim jīi neeyūuteva jiyuya'.

Soldauwe'sh tyā'wē yūuni' Dyus librute na'wē fi'jni cytey yuuc: Andy atjni's tyāawe'sh pwe'sh tyu'ndendety suerte caajrra jīna fi'jni'.

²⁵Tyā'wē yūutspachja', Jesusa's fyutsni cluus pucate nī'ljva ūsu'c vite' Jesus nī'lj yūcue, vite' Cleofas nyu Maria, vite' Maria Magdalena. ²⁶Atsa' Jesus nī'lj pucate Jesus wendynisa ij ūste Jesus uyrra', nī'lja's na'jīc:



(San Juan 19.25)



(San Juan 19.17)

—Naa pitstjē'ja' i'cue's jype'jena nchi'c na'wē jīrra', ²⁷tyāa pitstjē'ja'sva na'jīnac neewe'we:

—Na'sa' iindy mama na'wē jype'jene'nga.

Tyā'jīte', tyāa pitstjē'ja' tyāa oratey Jesus nji'ja's tyajy yatna pe'jna u'cj.

Jesus uuní

(Mt. 27.45-56; Mr. 15.33-41; Lc. 23.44-49)

²⁸Tyāa scjēua', Jesusa' jiic yu' jyuca cytey yuuna u'juetsteva. Sa' Dyus librute ma'wē fi'jni cytey yuucajncu na'jīna we'we:

—Yū'wēetj jīna.

²⁹Teech tasa vino utac ūsu'. Atsa' tyāa vinote esponja's tuupja'jrra fytūte atsjrra Jesus yuwete utyaty chanzhacajn. ³⁰Atsa' Jesusa' esponja's chanzharra', na'wēc we'we:

—Jyuca jyā'jnic neeyūu jīna'va, quūitsjuna' uuc.

Teech soldau Jesus tambyte yājani

³¹Atsa' Pascua fiesta en ājats yā'cj yu'. Tyāa ena' wala qui'snisa yu'c. Atsa' judiuwe'sha' fiesta ente uusaawe'sh cacuetu cluuscjē nviit wēemeerra', Pilato's pējtyti cluuscjē qui'pnisa chindaty chcandendeya' caacjan, dund uute' cacuetu tyajū quiisya'. ³²Tyajū' soldauwe'sh u'jrra chindaty chcandendety teehsa cjuē'yna, sa' vitenava tyā'wēytyi yūu Jesus pucacjē cluuscjē u'psa's. ³³Nava Jesusnava tyā'wēy yūuya' utyaana cūjrra', uunii yā'j u'ptety uy. Tyāa pa'gaty Jesus chindaty chcandendemée. ³⁴Tyā'wēteva, teech soldau yu' Jesus tambyte we'tjuc yāja'. Atsa' tyā'wē yājate', ee yu' yacju uwu. ³⁵Tyā'wē yūunisa's pta'shsa' tyajy yafyju yuuc uy, sa' isac we'we'. Sa' jīia' isa we'wetsrrava, cyaj i'cue'shva tyā'wē yuj yūune' sūjwa'ja's jī'pjune'cue. ³⁶Nava Dyus librute' na'wē fi'jni': iindy dyi'tjtyi' teehrrāa yujva chcajndemeetya jīni cytey yuucajnty tyā'wē yūu. ³⁷Dyus librutey vite ajcjē na'wē fi'jni ūsa': We'tju yājarra', tjengutyna jī'c.

Jesusa's pendani

(Mt. 27.57-61; Mr. 15.42-47; Lc. 23.50-56)

³⁸Tyā'wē yūunijū' Jose yaasesa Arimatea chjambuwe'sha' Pilato tashte utyaac Jesus cacue's pējyrra jyūna u'lja'. Atsa' Pilato' ewna jīte', Josea' Jesus cacue's pendaaya' jyūna u'cj. Naa Jose yu' Jesus ju'ngsac yu', nava judiuwe'shtyi ūucjrra quimva jiyunimeene' u'ljusa yu'. ³⁹Tyajū' Nicodemova pa'cj, Jesus yacj cus puuty we'wesa. Tyāa yu' treinta kilo ājc yu'tse tū'srra pa'j, mirra aloe yacj ca'ndnisa. ⁴⁰Tyajū' Jose' Nicodemo yacj Jesus cacue's jyūna u'jrra', yaptyi tyāa yu'tse ca'ndnisa yacj, judiuwe'sh ma'wēne'ta uusāa cacuetu pendá' tyā'wēytyi yūu.

⁴¹Jesusna cluuste fyutsni utyasu walta ūsu'c. Atsa' tyāa waltate' uusāa pendawa'j cagy u'sesa u'pu'c, quim yujtyva pendanimeesa. ⁴²Tycaaty Jesus cacue's cjicj, cafya' utyatec u'pu' atsa' qui'swa'j enva ājatscu yu' naa pa'ga.

Jesus qui' ityi yuuni

(Mt. 28.1-10; Mr. 16.1-8; Lc. 24.1-12)

20 ¹Qui'sen cjiçjiitste wala cusíi chji'ndytesy Maria Magdalena' pendaní cafyte cūjrra', cytee apjni cueta's quisiiniyā'j ūstec uy. ²Tyajū' wuwuurráac u'j Simon Pedro vite' Jesus wendynisa tashte pa'j. Sa' na'jīnac pta'sh:

—Cue'shtyi jype'jsa cacue's jyūna u'jne'ta pendaniijū, atsa' jiyumeetja'w mcaane'ta cjiç nanva jīte', ³Pedrowe'sha' teejwend pendani cafyte tjengya' u'jty. ⁴E'nzīi wuwuurráaty u'j, nava teeçhsa' tjaacue dund wuwuurra Pedro's pjyajtsrra' tyāa cjuē'y yatste cūjç pendani cafyte. ⁵Sa' cuyrra' Jesus cacue's yapnisarrāa u'ptec uy. Nava tyā'wē uyrrava, dyiite yu' u'came!. ⁶Tyajū' Pedrova e'ste cūjrra pendani cafyte u'cac, sa' tyāava uycu Jesus cacue's yapnisarrāa qui'pni u'pte. ⁷Sa' Jesus dyictjé yapnisa yu' tpejngrra fiite qui'pni u'ptec uy. ⁸Atsa' yatste cūusava cafy dyiite u'carra', tyā'wē tpejngrra qui'pni u'pte uyrra', Jesusa' ityi yuu yujgacy sūjwa'ja's jī'pjuc. ⁹Nava Jesusa' uurra qui' ityi yuuna jīna Dyus libruete fi'jni's jiyumeytyi yu'. ¹⁰Tyajū' Pedro Juanwe'sha' tyā'wē uyrra', yatna qui' shawendna u'jty.

Maria Magdalena's Jesus vyaani

(Mr. 16.9-11)

¹¹Pedrowe'sh u'juetspcachja', Maria Magdalena' pendaní cafy pucate ū'nena neeyūuc. Tyā'wē ū'nena u'píi, cafy dyiiga cuyrra' uycu ¹²e'nz angeleswe'sh chijmerrāa iicāj jyaatjsaty Jesus cacue's cjiçjnite pdyi'p cachrra u'pu', teeçhsa' dyictjé ja'ndate vite' chinda ja'ndate.

¹³Tyajū' angeleswe'sha' na'wēty pējy:

—I'cue' ¿quīj yūurra ū'nena ūscue? jīte', na'jīnac pas:

—Ū'cue's jype'jsa's jyūna u'tja, atsa' jiimeetj mcaane'ta cjiç nanva.

¹⁴Tyā'wē we'wepu'na' yu'tjengrra', teeç pitstjē'j yujurra ūstec uy. Nava tyā' Jesusna sūjme!. ¹⁵Atsa' Jesusa' na'jīc:

—I'cue' ¿quīj yuutecue ū'né'? sa' ¿quimnacue pacué'? jīte', Maria' cytee walta tjengsa vá' tyā'wē we'we' sūjrra', na'wēc pas:

—Indy vá'nga ū'cue's jype'jsa cacue's jyūna u'j na' mpeeta'sh mcaa cjiçjrrava, ū'cue jyūna u'cjan. ¹⁶Tyā'jīte' Jesusa':

—iMaria! jīnac cysus.

Atsa' Maria tupjirra na'wēc we'we hebreo yuweju:

—iRaboni! jīc, tyā' Caapiya'jsa jīni!. ¹⁷Tyajū' Jesusa' na'jīc:

—Andya's jya'ndynuwe, Tata tashna u'jmeytju naa pa'ga. Wejyva andy yacjtjē'jwe'shtyi pta'shya' me'jwe na'jīna: Andy Tata' i'cue'sh Tatafírrá', sa' andy Dyusa' i'cue'sh Dyusifírrá' tyajy tashna u'juetstju jīnac pta'shcaaj jīne'cue.

¹⁸Tyā'wē pta'shcaatje', Maria Magdalena' pta'shya' u'c'j: Jype'jsa's uytju, atsa' tyāac tyā'jīna pta'shcaaj jīc.

Jesus tyāa yacj u'jusawe'shtyi vyaani
(Mt. 28.16-20; Mr. 16.14-18; Lc. 24.36-49)

¹⁹Tyāa qui'sen entey cusa' Jesus yacj u'jusawe'sha' yatte u'carra vitytyi jyuca apjrraty ūsu', judiuwe'shtyi ūucjrra. Tyā'wē ūspcachja', Jesusa' tyāawe'sh pyājte vyaarra na'jīnac wecha:

—Ūucjmée wēt wētrráa yajcyna meswe.

²⁰Tyā'jīrra', tyajy cuse cpā'ty pta'shcu, tambyte we'tju yājani'sva tyā'wēy. Atsa' tyāawe'sha' Jesusa's uyrra' wala wechwecha yajcytyi.

²¹Tyajū' Jesusa' qui' we'werra na'jīc:

—Ūucjmée wēt wētrráa yajcyna meswe. Andy Tatava ma'wēga andya's caaj tyā'wēy andyva i'cue'shtyi cajaststu.

²²Tyā'jīrra', tyāawe'sh cajcuesu putjcu na'jīna:

—Miipa'gawe Dyus Espiritu's. ²³I'cue'sha' maatyva we'werra': I'cue'sh pcaltyi' Dyusa' peltunaīna jīte', peltunāyni yuutyna. Nava peltunaīmeena jīte', peltunāynimée neeyūutyna jīc.

Jesus ūtyi yuuni's Tomas uyni

²⁴Jesus yacj u'jusarrava, Tomas mellisu jīnisa' meec yu' Jesus tyā'wē vyaani ente yu'. ²⁵Atsa' Tomas yu' uymeeteva, Jesus yacj u'jusa vite yu' pta'shtyi:

—Cue'shtyi jype'jsa's uytja'w jīna.

Tyā'wē pta'shteve, Tomasa' na'jīc:

—Cusete claus cpā'vitni's uyrra tyajy tambyte we'tju yājani'sva uyrra tycaa andy cuse's caajmeerra yu', tyā'wē ūtyi yuune' sūjme'nja jīc.

²⁶Tyajū' teech qui'su scjēwniite', Jesus yacj u'jusawe'sha' qui' pcjaacjerra ūsu'ty teech yatte. Atsa' tyāa ente' Tomasva tyāawe'sh yacj pcjaacjena ūsu'c. Atsa' macue vitytyi apjrra ūsteve, Jesusa' tyāawe'sh pyājte vyaarrāac yuu, sa' na'jīc:

—Ūucjmée wēt wētrráa yajcyna meswe jīc. ²⁷Tyā'wē we'werra', Tomasa'sva na'jīc:

—Andy cusete cpā'yunity tjengrra, tycaa iindy cuse's mcupatj, sa' andy tambyte we'tju yājanigava mcupatj. Tyā'wē yūurra', cuj jwend yajcymée, ūtyi yuu yujga sūjwal'jrrá's ji'pjune'nga jīte', ²⁸Tomasa' na'jīc:

—i'Andyna jype'jsa yujng, sa' andy Dyus yujng!

²⁹Tyajū' Jesusa' na'jīc:

—Tomas, āchja' andya's uyrra', ūtyi yuu yujga sūjwal'ja's ji'pjung. Nava andya's uymeerrava tyā'wē ūtyi yuu yujne' sūjna yaacysava wechwecha fi'nzewa'jsata' jīnac we'we.

Jesucristo' Dyus Nchi'c yuj yu'c jīna pta'shsa' naa libru'

³⁰Naa quiwete quim yujva ājanimeesaty Jesusa' wala cuj caavya'ja'cj tyāa yacj u'jusawe'shtyi. Nava jyuca yu' naa libru'te fi'jnimeeta'. ³¹Nava

Jesucristo' Dyus caajni tyajy Nchi'c yuj yu'ga sūjna jiyurra' tyā'sna jypa'garra', psuméee ityi fi'nzewa'ja's ji'pjucajn pta'shna fi'jnisarráata'.

Tiberias ícj pucate Jesus vyaani

21 ¹Jesusa' Tiberias ícj wala pucate qui'quin na'wēc vyaa tyāa yacj u'jusawe'shtyi. ²Cytee pcjaacjerraty ūs yu' Simon Pedro, vite' Tomas mellisu jī'ty tyāa, vite' Natanael Galilea quiwesu Caná chjambtewe'sh, vite' Zebedeo nchi'cwe'sh, vite' e'nzsa. ³Cytee pcjaacjerra ūsrra', Simon Pedro' na'jīnac we'we:

—Wendy uweya' u'juetstju jīte':

—Cue'shva indy yacj yujtja'w jīnaty pas tyāawe'shva.

Sa' teech barcote cjēerra u'jty. Nava tyāa custe' teech wendy yujva uwemeeta'. ⁴Cjicjyna sējetste', Jesusa' ícj pucate vyaac. Nava tyāawe'sha' jiyumeeta' quimteva. ⁵Tyajū' Jesusa' na'jīnac pējy:

—¿Teech wendyrrá' uwecue'? jīte':

—Uwemeetja'w jīna paste', ⁶Jesusa' na'jīnac jycaaj:

—Wendy ucje's patsu ju'ngcē macjwe, sa' uweene'cue jīte', tyā'wēy ucje's acjrra', yu'ju wenzhrrava cutyi'jya' chjāchjameeta', wendy iiméj cuy cjēepa'ga. ⁷Tyā'wē yūuni's uyrra', Jesus yacj u'jusa wendynisa' Pedro's na'jīnac pta'sh:

—¡Naate ūsa' tyā' cue'shtyi jype'jsa'!

Tyā'jīna we'wetspcachja', Pedro' tyā'wē wēse'jna' ropa's jatjna'va yu'cjē cjēec Jesus tashna u'jya'. (Ropa's pajnderrac ūs yu', tyāasac tyā'wē yūu.) ⁸Barcote neeyūsáa vite yu' wendy ucje's wenzhna cūjty, cien metrorráac ūjndyte cūuwa'lj peejy yu' naa pa'ga. ⁹Tyajū' barcoju jysa'jrra', ipy yutjni chjā'chja cajcuega teech wendy pety pan cjicjni ūstety uy. ¹⁰Tyajū' Jesus we'werra':

—Áchj uwenisa wendytyi mneejyūjwe jīte', ¹¹Simon Pedro' barcote cjēena'va wendy ucje's wendy walasarrarráa ji'pjsa's wenzhna cūjc ūjndyte pa'j. Ciento cincuenta y tres wendycu ji'pju'. Cyaanzcuēe wendy ji'pjrrava, ucje' suteme'.

¹²Tyajū' Jesus pa'yarra':

—Ū'ya' myujwe jīc.

Tyā'wē pa'yate', tyāa yacj u'jusawe'sha' jype'jsateva jiyurra', maa yujva: Indya' ¿quimnga? jīna pēyi'tsmeeta'. ¹³Atsa' Jesusa' utyaana cūjrra', pana's uwena'va tyāawe'shtyi ūsu'scu, wendynava tyā'wēy.

¹⁴Jesus uurra qui' ityi yuunijū naa yacja' tecj us vyaac tyāa yacj u'jusawe'shtyi.

Jesus Pedro's neewe'weni

¹⁵Tyajū' ū'na jyā'jrra', Jesusa' Simon Pedro's pējycu:

—Jonas nchi'c Simon, ¿ayte ūsta' tyāawe'shte jytjaacuenga' andya's wendy'íá'? jīte', Pedro pasrra':

—Indya' peecy jīing andy indya's wendyitsteva jīte', Jesusa' na'wēc neewe'we:

—Tyā'wērra', andy piishacuēty wendyna miipe'j jīc.

¹⁶Tyajū' Jesusa' Pedro's qui' pējycu:



(San Juan 20.15)

—Jonas nchi'c Simon ¿andya's wendyi'ngá'? jíte!, Pedro pasrra!:

—Indya' jing andy indya's wendytsteva. Tyā'jíte!, Jesusa' na'wēc neewe'we:

—Tyā'wērra!, andy piishaaty sāl'jīna miipe'l' jīc.

¹⁷Tecj usva qui' pējycu Jesusa!:

—Jonas nchi'c Simon, ¿andya's wendyi'ngá'? Atsa! Pedro' wala ñuscu tyā'wē tecj us ¿andya's wendyi'ngá'? jīna pējyte!. Sa' na'jīc:

—Indya' jyuca jing andy indya's wendytsteva jíte!, Jesusa' na'jīnac neewe'we:

—Tyā'wērra! andy piishaaty jypa'yacy miipe'l'. ¹⁸Isatj we'we!, nyafīi pitstacyteya' ropa's peequí jatje'ng, sa' mtee u'l' wēerrava u'jue'ng. Nava īish yā'tje!, vitesa' indya's tundrra jyūna u'juetyna indy u'l' wēemeeteva.

¹⁹Jesusa' tyā'wē we'werra!, Pedro ma'wē yūuni uurra Dyusa's āate caavya'jal'jwa'ja's pta'shnac tyā'jī.

Tyajū! Jesus we'werra':
—Andy yacj myujrráa jīnac pi'cy.

Jesus yacj u'jusa wendynisa

²⁰Pedro' yu'tjengrra' uycu Jesus wendynisa's. Tyāa wendynisaíi nmej cus ũ'wetste!, Jesus pucate cachrra u'prra' na'jīnac pēysa yu': Jype'jsa ¿quim indya's ducjwa'jsana? jīna. ²¹Tyā'sna Pedro uyrra', na'jīnac Jesusa's pējy:

—Jype'jsa, naa pitstjē'ja's ¿quij yuucy? jīte!, ²²Jesusa' na'wēc pas:

—Andy jytjāaste' naa pitstjē'ja' uumée u'juma'c andy shawendna quījpcach, nava tyā'sa' indya' yaacywa'j jī'pjmeeng. Indya' andy yacj fi'nzewa'jrrá's miijajcy.

²³Jesus tyā'wē we'wepa'ga, tyāa pitstjē'ja' uuwa'jsamée váana sūjnaty ũsu' Jesus yacj u'jusawe'sh vite yu'. Nava uumeena jīrra Jesusa' tyā'wē we'weme!, naasáa andy jytjāaste', uumée u'juma'c andy shawendna quījpcach, nava indya' tyā'sa' yaacywa'j jī'pjmeeng jīnarráac we'we.

²⁴Jesus we'werra' tyā'wē uumeena jīna we'wenisa pitstjē'jīrráac pta'shna fi'j, atsa' isasa yuja's we'we'c sūju'tja'w.

²⁵Tyā'wē Jesus quījquijva caavya'ja'jnity jyuca pta'shna fi'jvatsa', naa quiwete libru yuuva cjēemeetya sūju'tj.